

嘯兩草堂集



嘯雨草堂集卷第五

太倉 盛徵璵

小雲

詞二十八首

秋波媚

閨怨

誰家夫婿昨宵回攜手整鸞釵衾邊紅豆枕邊紅淚送箇
人猜 艱難那得逢如願消此合歡杯重門扃罷孤燈挑
罷沒箇人來

賣花聲

春思

燕子話呢喃放下珠簾養花天氣夢難酣怕聽樓東鈴語



脆腸斷江南 酒病正恹恹
衾底寒添幾分紅雨落花黏
聞說踏青諸女伴污了鞋尖

荷葉杯

明月天涯杯酒搔首何處是紅橋鶯雛燕乳一枝簫未到
已魂銷 簾底星河如海歡待香夢惜匆匆聘錢十萬也
難通無語咒東風

金縷曲

和陸萊臧寄懷

一片秋聲老正相思更闌夢冷九峯三泖千里故人遺尺
素無限離思傾倒更絕妙移情新藁回首西湖同放艇最
銷魂疎柳風前嫋重遊否認鴻爪 看花紫陌都成惱猛

歸來故園無恙銜杯朗嘯話到江湖清興發又看君山春
曉且莫管杖頭錢少只問窮愁誰似我滯天涯腸斷萋萋
草思君瘦恁如擣

青玉案

寒夜聽雨

敲櫺敗葉紛難數又凍雨連宵度脉脉鄉心何處訴燈花
如豆眼花如霧索甚相思句 前塵觸撥沾泥絮可惜斜
陽促人去消瘦腰肢今幾許一分詩思十分愁緒喔喔隣
雞曙

菩薩蠻

南城看菊

西風一夕秋懷苦飄蕭獨立秋顏古抱此歲寒心相逢調
素琴花前誰送酒花下頻招手欲插滿頭歸恐傷蓬鬢
稀

霜天曉角

寒望

黃蘆青荻月落魚龍寂有箇鴈兒飛去秋水白一聲笛
目極愁欲滴酒家何處覓依舊掩關高卧牕下竹任敲擊

買陂塘

寄懷黃友蓮

最傷心勞勞塵海相逢誰是知己吹簫醉倒蘇臺畔况味
料同淮市休說起儘萬卷羅胸只好狂歌耳吾非國士也

白眼看人黃花縱酒跌宕有如此思歸夢恰值橙香橘
美吟魂遙墮雲水商量好事翻成恨寂寞吳江詩壘還可
喜算月落烏啼君在蘆花裏冬心瘦矣願燕子來時春水
泮後寄我一雙鯉

高陽臺

同達厚庵范味蓮飲雷菱洲齋中

海內詞人天涯知己無端小聚樽前莫說飄零眼中又是
殘年任他歌扇鈿箏夜到晨鐘一樣堪憐只傷心無恙江
湖鷗夢難圓千金裘馬看花客問何人捷足着了先鞭
但看榮華淒涼杜宇啼煙勸君且盡杯中物乍搏沙又作
離筵話悽然一舸西泠風雪驚眠

時菱洲有
武林之行

滿江紅

韓侯釣臺懷古

烏盡弓藏尚說甚一軍大將只可恨陰謀鍾室都由蕭相
欲立真王還算假不分漢鼎翻遭謗到而今灑涕論英雄
聲悲壯 懷一飯千秋仰滅三族千秋悵且狂歌斗酒登
臺一望生死總歸兒女手功名齊付淮陰浪剩星星漁火
半篙明傳清唱

念奴嬌

遣懷

菱花掩罷怕蛾眉瞥見者番纖瘦昨夜相思今夜夢腸斷
情人去後閒煞闌干海棠無伴風露誰消受銀釭又爇丁

冬愁數銅漏 何苦費却工夫翻成花樣把鴛鴦重繡一
丈愁絲揮不斷枕上冰痕濕透聽到晨雞黃金無用種甚
紅兒豆無情石佛問他曾憶儂否

釵頭鳳

歡場促商飈酷射櫺寒氣燈如粟曾相見金釵讌淺斟低
唱舞衫歌扇戀戀戀 無愁曲愁盈斛淚痕斜點湘醺綠
簷花顫飛銀霰一年殘夢一宵尋遍倦倦倦

珍珠簾

春寒小雪枝頭滿踏青期寄語蘭房同伴且莫繡羅鞋此
事姑從緩決箇輸贏紅骰子待妹來早烹香薜消遣恰鸚
鵡傳言畫簾宜卷 何事鎖了眉頭背銀屏細語模糊難

辨會否上高樓撲地楊花軟縱有新愁千萬斛也不用盈
盈腸斷宵短看玉蠟多情開花如繭

六么令

李少白惠贈王石谷山水畫扇率題於背

萬山紅樹添箇尋詩者昨宵夢回勾漏偷取臙脂灑爲問
來青閣上粉本從誰借疑真疑假暮鴉幾點飛上垂楊墨
雲瀉 三載辛峯寄宿袖裏煙霞惹攜酒吾谷村邊看盡
霜枝赭誰料秋螺十斛多半毫端寫疎林茅舍有人遲我
月上柴門未扃也

蝶戀花

題雷存齋丈攜酒聽鸚圖

匝地垂楊春影墮勸倒芳樽如許鶯簧可流水空明雲澹
沱此中有我還無我 絕妙詩情花落妥庭樹無言一抹
斜陽鎖何事勞勞馳道左不來花底掀髯坐

瀟湘夜雨

書家信後

萬點寒鴉一林風笛鄉心飛下蘇州離家九見月如鉤紅
豆熟休提舊恨黃菊敗旋惹新愁殷勤語歸來補屋莫漫
勾留 天涯王粲那堪久病恁又登樓聽蕭蕭絡緯一片
殘秋燈太喜平安怯寫衾太薄魂夢難流從頭說翻增懊
惱貂敝更無裘

最高樓

旅况蕭條壯心蹉跎行年廿五忽見二毛不無
潘令之悲况有相如之病夢醒燈涼百愁交作
爰填此調以示同人

來何早兩鬢忽星星畢竟爾無情滔滔流盡三生夢堂堂
誰是百年身拜靈均尋子美泣蘭成 我不悔儒冠遭餓
死亦不羨錦衣年少子蠻觸事沒輸贏只愁飲罷無歸處
拚將去路屬鷗盟故人來須記取蓼花汀

勸金船

同達厚庵訪程丈禹山

呼來小艇文津泊疎葢橫籬角經霜細草遊蹄弱嘆如此
蕭索酒到難辭况有菊英堪嚼爲問一年詩夢曾否如昨

先生識字甘投閣不用嗟搖落才名見嫉難拋卻費多
少商畧絕妙生涯合付一雙芒屨呼作謝家山賊料也心
諾

水龍吟

答許莘農

萬間廣廈虛懸也無一片漁樵地思量往古子雲投閣相
如滌器何物功名寂寥身世兩行殘淚縱君才八斗唾壺
擊碎誰能解平生意 况值風顛雪墜話牢愁一般滋味
強拈秃管幾曾思敵元龍豪氣欲約寒鷗沙眠水狎談何
容易待梅花信準蕭齋月落酒瓢同醉

花自落

雪

飛翼弄補得蒼苔虛空紙閣無人尋鶴夢寒輕還未凍
且把瓦瓶清供可惜梅花遲種一笛高樓風又送今宵開
酒甕

滿江紅

酬次許莘農韻

月冷青袍歎三徑黃花過了只孤館寒燈挑瘦自刪殘藁
淚滿窮途傷庾信綠慳踏雪尋安道問何時準辦一扁舟
煙中笑 况詞賦江關少剩杯酒天涯倒恨謫仙死矣廣
陵音渺散髮儂將隨海霧掉頭君要凌蓬島道無雙誰料
士還雙生才好君與伯兄汝官
齊名人稱二許

一萼紅

題焦文甫茂才青氊紀夢

且停杯問人間何世冷落謫仙才傀儡場中邯鄲道上不
合揮手而來也知道雲煙富貴訊青天青眼爲誰開如此
蛾眉無人領管怎不心哀 僕也情癡之客自紅樓夢冷
青鳥音乖欲訴蘭因空增絮惱誰復憐我塵埃只今想身
爲蝴蝶好尋君結隊上天台不許庸奴白眼浪費驚猜

如夢令

題友人壽陽點額便面

十二欄杆如水一樹寒香侵被春色著人妍夢落水晶簾
底無睡無睡翠羽枝頭鳴矣

醉江月

題嚴子通煙江倡和圖

玻璃萬頃問誰家公子畫船輕渡兩點金焦明滅裏勾起
詩情無數斟徧清尊攜來快友要拂珊瑚樹暮潮生矣一
枝柔櫓搖去 忽憶去歲春生江南雨暗一舸迎瓜步拍
枕濤聲眠不得儂也推篷而賦恨少蠻牋又無綵筆繪出
江天趣今朝讀畫畫中可許同住

隔簾聽

題友人簾影圖照

如此碧梧修竹問是誰家院湘紋窄地無人捲有一縷煙
絲半床詩卷細尋徧想紗牕晝長人倦難謀面 幾回消

遣同把瑤琴薦玉闌干外花香輒隔簾聽去風濤難辨有
誰見除非一雙梁燕

如此江山

題沈雉橋曉風殘月小影

濛濛煙水天涯路蛾眉半彎如畫听側波平舟輕霧重寒
壓烏篷難挂空明世界只擁髻淒然舊愁閒惹一片風絲
絲絲挽起柳腰拜 頻年江上待渡認山容漸減儂也心
訝酒力嫌微吟魂欲斷生怕五更鐘快雪泥何在早似夢
如塵不堪重話月落烏啼載蘭橈去罷

天仙子雙調

題達厚庵看萍書屋詩鈔

奇絕萍蹤迴大海酒國吟壇盟一載袖中詩本最清新花
破蕾霞流彩多少珍珠穿百琲唱徧驪歌難久待聚散
搏沙真可慨相思後夜月玲瓏豪興邁朱顏改春滿天涯
遊子在

西地錦

燈下次韻和厚庵

天氣已涼寒未作去三分愁意沈沈漏永濛濛細雨悄無
人地只有詩筒相寄寫一腔秋思殘燈欲殺眠還起遲
去林間煙霽

嘯雨草堂集卷弟五

嘯雨草堂集卷弟六

太倉 盛徵璵 小雲

賦十首

一枝巢賦

射陽學舍廳事之東有屋三楹莫釐山人顏曰一枝巢嘉
慶庚辰夏五月家君葺而新之朋儕會合文酒飛騰璵也
承權迭更寒燠繁花蔭葉幽鳥呼雛掃榻趨庭攤書侍校
人稱小隱館號忘憂鶴分半菽之糧鴻印一痕之雪爰成
斯賦聊以敘懷夫其草帶侵階涖衣冑石映月牆低藏雲
徑窄霞襯樞紅星搖榆白桺甍甍以抽條棗垂垂而成實
喜叩戶之聲稀愛眠琴而意適籬餘晚節之香座少塵容

之客若夫囊琴閒憩杖策權迎敦槃良會編紵新盟滌茗
泉冽炊黍香清臘月之釀入夏而開甕霜後之菜當春而
煮羹則有藜牀促坐接離倒傾一醉十日五日滿室歌聲
笑聲何必撫瑤瑟調銀箏籠麝煙於綺席銷蓮炬於粧檠
旣而秋浦懷人春江送別或維海上之舟或醉燕臺之月
感人事之推遷訴離憂於倉卒乳燕飛迴流鶯啼歇舊壘
穿雨脚之斜空梁吐月鉤之缺璣也親陪晏笑長侍庭闈
悲慈烏之反哺憐窮鳥之相依朱顏未凋華年將逝慣惹
病魔難驅詩崇悵蒲柳兮先秋非金石兮易敝蒙鳩之羽
已摧鷓鴣風之翮誰試野田有黃雀之傷瑤池少青禽之至
幸而高堂健飯吏隱宜詩及菁華之未竭有饘粥兮自怡

樂琴書兮嘯傲詢黜陟兮不知暇豫無集枯之嘆綢繆深
未雨之思學安巢之巢父藉鷓鴣之一枝

范味蓮云神韻悠然其清綺處直入蘭成之室

春影賦

望仙之樓鬱金之堂珍珠簾卷時聞衣香則有衛豔陳娥
秦姬趙女耀素彩於明璫垂鮮光於翠羽碧煙如霧紅雨
如塵粉黛無迹胭脂有痕雲容容兮要眇風策策兮黃昏
岫橫欹斜屏山凹凸雕闌深淺之花石檻朦朧之月輕遮
繡幔閒倚薰籠排籤字細剔穗燈紅訝珮聲之若近疑情
語之先通俄而紫玉成煙綠雲如幕情深望遠之天目斷
臨春之閣記影事之分明訴春情而索莫流水不歸朱顏
非昨有恨難描言愁奚託彩雲散兮何處香夢杳兮誰尋
流霞之卮飲恨卷施之草傷心鶯花歲歲院宇沈沈悵浮
生之幻相覽明鏡而霑襟

汪厚夫先生云綺語傷春仙心繪影可謂哀感頑豔
矣

白桃花賦

風廊春夜水榭花晨曲瓊有影步障無塵煙輕網戶香靜
畱人有所思兮延佇羌小立兮逡巡石室何年仙根誰種
雨洗紅消雲移綠送綺陌人歸霓裳仙衆玉臺柳絮之痕
晶枕梨花之夢繽紛珠琲狼藉瓊瑤交枝灼灼接葉天天
溪平易浣山澹難描新禽失素嫩蝶分嬌白恰臨風動玉
驄前路遙一簾花影日初夕三月餘寒雪尚飄露井初酣
銀槎若近開窈窕之雲屏列參差之石筍紅牆則隔牖迢
迢翠水則迴波隱隱乃有繡閣褰帷香車接軫曳縞帶以
來遲粲玉齒而微哂瑤池之仙馭初停武陵之漁舟誰引
月明如晝春澹於秋屈曲藏雲隴璽瓏近水樓劉郎紫舊

夢崔護賦新愁望美人兮杳何處怨靈瑣兮不少留別院
聽歌重門深閉平陽嬌女之樓號國夫人之第傅粉添肥
勻脂嫌膩乍斂豐容微含愁意風斜而舞燕身輕雨濕而
流鶯聲細宵霧晨煙春光可憐落英滿地細草粘天醒珠
樓之綺夢罷玉樹之歌筵於是倦客思歸春人贈別千尺
深潭頻年寒食衣澣緇塵唵殘白雪惜花事之將闌獨臨
風而悽絕

彭甘亭先生云其秀在骨不爲脂粉所汗

愚公谷賦

齊人有畜牛以買駒者人皆笑以爲愚家居萬山之中桓
公射獵而入問之曰此愚公谷也其洞幽邃其徑繚曲其
俗真率其民醇樸有漉遲偃仰之樂無罔羅機辟之辱與
道相輔如建德之在南越人貌而天若順子之居東郭乃
有軼俗之士離垢之徒糝糠塵世胥疏江湖不夷不惠似
癡似迂魚鳥則因性所適馬牛則隨人自呼于是養拙林
泉怡神邱壑水狎閒鷗花餐病鶴起居無時常據惠子之
梧服食甚健不問葛洪之藥忘機智之變幻藉踈愚爲寄
託行止自如聰明毋作百憂屏除此間可樂夫其室小于
楮櫛踈于葉如館蝦鬚如巢蚊睫圭竇雲穿繩牀山壓石

似頑而點頭花非狂而拄頰款扉攜侶掃徑延賓尊酒雞
豚之社衣冠懷葛之民松間雲意俱懶竹外鶯啼自春脫
粟之飯可飽野蔬之味愈真亦有倚壁挑鐙臨溪滌盥倦
撫琴絃強呼詩伴花經雨而猶澆衣畱痕而不澣山曲雲
平池方月滿賓朋則樂數晨昏氣候則幾忘冷暖笑食字
之蟲魚訝成仙之雞犬雲溪有醉侯之居淮南有招隱之
館維時有客倦遊來從遠道尋谷口之餘春拾山中之芳
草憩窟室以徘徊愛坳堂之清宵願買山而有錢擬卜廬
以終老遂乃謝塵囂修初服學原氏之安貧守老子之雌
伏倚樹聽琴牽蘿補屋旣窈而深寤歌且宿苟得任其踈
慵夫何慕乎顯祿

楊叔温先生云空山無人水流花開與淵明桃花源

記異曲同工

玉簪花賦

雕闌柔曲香雲墜旖旎花容鬪妍媚覽鏡風鬟弱不勝移
鈿月榭粧初試嫩茁銀簪柄嬌酣碧玉栝歌臺人忽去箏
閣夜重開釵梁麗殺螺窺黛盃葉輕勻鶴啄苔當夫籠袖
涼生停鍼人倦影暗羊鐙聲遲虬箭羅巾則繡蝶雙棲寶
髻則編珠成串舉錦幔以藏鉤入瑤房而收釧瓊瓏朱鳥
之牕掩冉青苔之院若其蘭階玉綴芍砌簪抽顰低眉鎖
豔淺花柔金屋鴛鴦之瓦晶簾翡翠之樓訝釵分兮燕瘦
疑珥卸兮環肥薇帳畱香遠蘭膏照夢微續紛排繡縷婉
轉弄明璣風清花巷鈴聲細露溼莓階屐齒稀洞房兮延
秋曲臺兮餞夏小蟻撥兮朝朝羅薦陳兮夜夜獨奈愁顏

雨洗殘鬢雲鬆影伴珊珊翠裘鳳子嬌無力纖手擎來白
玉盤

孫少初先生云鏤紅浴碧玉笑珠啼萼綠華杜蘭香
呼之欲出

紅心草賦

春寒病起散步郊垞風花曳紫煙絮迷青見叢生之滿路
濯微雨而含馨有客指而告余曰此紅心草也伊昔屨廊
人去香徑塵生悼吳宮之寂歷感異夢于幽冥繡幄麝蘭
之氣璇臺笙管之聲鳳牌錦字鴛帳仙輶怨墜歡之難拾
感小草而傷情僕本恨人追維往事夙工吳質之愁易觸
潘郎之思冰簟眠雲湘簾垂地萋萋鬪草之辰點點傷春
之淚北邙葬玉上邽埋香泣殘紅豆厄甚黃楊惜餘春兮
付流水望遠天兮空夕陽苦竹太苦祥桑不祥愁根牽蔓
恨葢抽芒翠菱千絲之桺紅欹一丈之薔霧黯黯兮晝將
暗風蕭蕭兮夜正涼銜悲何極飲恨難量幻影非真芳心

誰託願迴寸寸之腸重訂生生之約東皇鑒其誠慄少女
申其然諾俾蠲忿而忘憂永合歡而長樂卷施則拔心不
死細菌則連珠不落癡心卜靈鵲之期愁緒似春蠶之縛
草長鶯飛風斜雨微呼童覓徑與客言歸愁絲橫路淚點
霑衣玉釵墮兮紫煙化羅幃掩兮青苔肥三春兮代謝百
卉兮具腓嘆榮華之已落感好夢之都非

顧子雨云哀感頑豔盈盈紅淚濕透鮫綃

暗水流花徑賦

客有泉石神娛苔岑交澹水榭開尊柴荆繫纜欣舊雨之
重逢忽夕陽其已暗俯階前之叢碧徑借花深引門外之
清渠簾邀月瞰當夫賢主傳觴良朋擘紙抒別緒於飛花
託吟情於流水如隱水雲之窟寒欲沁脾如來輞水之莊
流堪漱齒丁冬響處約畧蒼苔滴雨之聲子細聽來分明
深竹浮煙之裏則見庭陰似墨草色如油昏林鳥宿暝樹
雲浮曲徑花明好闌數弓之地空階水暗知非百尺之湫
獨憐燈火微青訝覆杯其何許惜少螢光夜燦問咽石兮
曾不漫存掬月之思何曾在手若動揮毫之興幾欲臨流
潤蒸文砌活泛穠花冷浸一畦之菜溜穿六枳之筓笑醉

眼之模糊源頭安在問靈泉之吞吐牆角非耶倚樹而吟
似有梅香浮動烹茶而汲還疑桺葉紛遮不見科盈祗聞
響應清濁奚如疾徐未定懸猜莫得屢迷下漏之壺適從
何來已出通幽之徑遠若瓦藤之覆環南北舍而週遭近
疑嶂霧之橫接東西澗而綿亘不必決渠降雨聊浣煩襟
或其吹月舒波倍添吟興維時貝列春星珠凝香露開松
徑以重遊愜酒懷而小住有如此水結浮瓜沈李之緣不
少名花得露坐風談之趣桃含宿雨暗溼苔衣柳掠春泥
暗侵葛屨際此杯長燭短高吟子美之詩况看簣覆堂坳
勝讀蘭成之賦

王春畬云風清不雜體約不蕪是唐人小賦中最高

之品

譚石舫云摹寫工細神韻悠然

春草秋更綠賦

湘簾籠霧碧簾生塵煙蘿滴翠石蘚鋪茵訝羣芳之未歇
值秋色之方新何處懷人空結蘼蕪之佩不堪送遠猶留
杜若之春原夫謝元暉身寄京華情牽遠道南中看橘柚
之榮洛下憶鶯花之早吟春事兮匆匆訴春情兮草草苔
痕映處煙澹疑無柳色籠餘陰濃未掃睡鴛鴦之六六菜
甲低萌垂翡翠之雙雙簾丁欹倒若夫秋風蕭瑟秋露沈
浮葉何秋而不落草何歲而無秋雖欲採芳信於園丁重
傾婪尾憶舊遊於亭午試豁吟眸而濃蔭繽紛皆應秋期
而減綠秋懷浙瀝忽驚晏序以添愁茲則綠復綠兮芊眠
春非春兮掩映疑新水之痕拖望平蕪而色更錯認鴨頭

嘯雨草堂集卷之六
二
縠出融縠浮香偶教蠟屐尋來和煙染淨昔日王孫把袂
贈紅豆以牽情此時倦客憑闌倚綠筠而思詠則有玉帳
淒涼榆關躑躅將軍大樹霜寒苜蓿之花都尉前營月冷
芙蓉之褥弔古冢之留青望平沙而怨綠馬蹄風急芊芊
無限之愁雁磧雲磧脈脈相思之曲正值秋容慘澹已腸
斷於刀環回思春夢闌珊更魂消於銀燭也別有金屋拈
鍼瓊閨織素意蓋栽情愁花索句雙鬟亥字之珠百結丁
香之樹斜陽欲墮翠袖生寒清夢初回碧紗如霧玫砧送
響催蓮箭之三更玉枕量愁問銀河之幾度從此江關秋
老綠意堪憐安得繡閣春歸紅顏如故池塘春草登樓吟
康樂之詩南浦綠波寫恨擬文通之賦

黃友蓮云編珠作字鍊玉生煙

秋水共長天一色賦

雲山一碧上下相於遙連荆越近接衡廬地扼三江之勝
秋當九月之初浴碧浮青神委盤盪於雲嶠協靈通氣洪
流吐納乎星渠盪日月之雙丸到眼別開境界吸乾坤之
一氣此身溷迹樵漁維時洪都餞客高閣維舟十旬休暇
千里淹留都督則方開華宴宇文則恰受新州赴水神七
百里之風期駕孤帆而容與排天閭十二城之雲氣挾飛
仙以遨遊金碧三篙櫓響破濤瀧而徑度蔚藍一色波光
連霄漢以橫秋赤岸衝沙青霞疊嶂嶺斷雲連天低野曠
是空是色迷漫翻天半之流疑有疑無欸乃徹雲中之唱
試橫槊而談往事此恨難消欲搔首而問青天斯遊何壯

夫其朝旭瞳矓孤篷蜿蜒天浸水而秋激水拍天而勢遠
湧模糊之曙色四圍畫閣晴開增鞞鞞之餘音六幅蒲颿
坐穩望斷寥天煙水隨風馭以身輕笑凌大地山河豁塵
襟於秋晚至若返照迴波虛光入澗罨薄霧於林巒散夕
陽於葭葦待鼓成連之楫直接渺茫倘然温嶠之犀更驚
變幻俯而瞰之則半江紅樹歸艤賣晚市之鱸仰而矚之
則九點蒼煙清唳落隨陽之雁則有荻岫尋秋蒨江遞信
對遠水兮相思望美人兮儵瞬天幕江心之碧鰲身隱現
以吞波風吹水面之紋羊角扶搖而壓陣淵明於鏡濤漣
朗今輪圓舟小於蓮浪縈迴兮勢順又有五湖客夢雙槳
詩情託雲濤以泛宅偕鷗鷺以聯盟何處星槎隨青雀黃

龍而直上誰家畫舫指白蘋紅蓼以前迎環樓榭之千家
雁齒橫遮乎虹霓浴滄溟之百寶蚌珠晃耀乎鮫鯨宜乎
逸興遄飛童子登高作賦天才無敵閻公拍案先驚彼夫
蘭亭積圯梓澤摧殘識盛筵之難再欣勝地之何寬對茲
碧水長天共誰嘯咏剩有珠簾畫棟供我盤桓試尋別館
於江干風流何在爲覽秋濤於天際終古同看

李虎觀先生云潤聚金碧氣清無沙土痕

筆非秋而垂露賦

庾蘭成以絕代之閎才冠六朝而誰匹建禮含香崇賢觀
日高甲觀之鴻詞受丁年之顯秩傳賤則墨瀋淋漓擗管
則言泉流溢擬露華之點滴不受塵埃得秋氣之澄清自
然後逸一從橐筆而馳驅不禁當秋而蕭瑟射策東宮之
歲記曾奉詔以聯吟客遊西魏以來誰共題襟而載筆乃
有名王趙郡賢牧京畿印擅益州之掾文揚上柱之輝贈
新篇於開府攄芳翰於瓊闈累紙輕圓愛凌空之蕩漾飛
毫厯落看凝素之依稀濃薰繭紙之香心清茉莉薄暈冰
綃之豔手盪薔薇聞掃葉之聲秋其至矣訝垂條之露是
耶還非徒觀夫露珠宵綴露采晨流曝衣香閣穿線鍼樓

梧桐葉上楊柳枝頭或垂穗濕珊瑚之架或垂簾侵翡翠
之鉤此皆應秋期而零露亦復浥露潤而知秋若非秋到
人間月皎而千山夜朗未必露垂枝上宵闌而萬點痕留
爾乃綠沈吐潤雕管抽思字訝蘭薰而透馥詞疑露點而
含滋黃絹初舒徧灑團團之薄潤碧筒乍啟微沾的的之
芳姿倒披薤葉之青雨汁鎔成瀝液濃漬松煙之翠鱗紋
削出之而則是秋還未到露已先垂初滲滴而厭浥旋漸
瀝以紛披無待金盤之貯也全憑妙筆以凝之蘭臺宋玉
之風秋懷頓起桂苑陳王之榭涼意先知蘭成於是展濯
錦之華牋答拈花之麗句幕府大將軍相與唱酬丞相平
津侯同其景慕涌原泉而不匱直同膏醴之長流照烈日

以匪晞何慮英華之太露此應詔於華林園裏莫愁椒殿
之春蕪而賦詩於太液池頭恍惚栢梁之秋暮者也方今
松牖凝薰芝房含煦炳
睿藻而禱皇盍

堯尊而普獲陋晶盤於畢勒沆漑醲瀼薦林在於崑崙醜
醜密灑竚見含毫馥郁鐫十華寶露之銘且看簪筆雍容
奏五色卿雲之賦

黃友蓮云觸手春生揮毫珠散清新俊逸兼擅其長

嘯雨草堂集卷第六

嘯雨草堂集卷第七

賦八首

同律度量衡賦

太倉 盛徵璵 小雲

有虞氏輯藩侯之五瑞頒樂律於羣工運會開乎元造制
作法乎圓穹舞簫韶之九成音求嶰竹達陰陽之二氣數
起律簡蘊其神於八十四調端其始於三十六宮聲律身
度垂爲法月量星衡得其中宣宇宙之太和陽開陰合建
中和之盛軌道一風同原夫黃鐘爲律呂之根秬黍驗縱
橫之術權損益於上生下生準律同於倍實四實徑則三
分有奇數則八十有一初六生於初九之爻子聲肇乎正

鳴下直堂集卷之二
一
聲之律度以上廣下廣之尺絜黍探微按以生規生矩之
方吹箏響出輕清重濁統而會之類唱和之喁于高下短
長比而同之定宮商之徐疾十二均用以法天九十分因
之衍度度極於引減之而丈尺以明度始乎分增之而尺
寸以布正聲倍而變聲半握算胥得其統宗只有短而寸
有長布指可知其度數如布帛之有幅無事田父玉尺之
量如經緯之從心可正文利黃鐘之誤於是積黍以推遂
成嘉量龠之所躍累以一千二百實能容徑之所空計以
三分四釐無不當聚於斗角於斛如吹律以回黍谷之春
合於合登於升如播律以候葭灰之颺此合方氏同於千
百國因地以新彼大行人同於十一年歷時已曠分量之

黍用以平衡百黍爲一銖取四銖而三倍之得兩之半兩
龠爲一兩取四兩而四倍之見斤之明頒茲器於蒲穀躬
桓鈞石啟姒王之府比其制於璽符斗甬權衡信王道之
平然非五聲十二律還相爲宮三百六十度音無不具則
節以制度或隨月量以參差與以行權且致星衡之舛互
今則王母仰巡方之聖玉琯諧聲天子呼教胃之夔宮懸
掌故萬根苞殖一名一物正其稱百族光昌九敘九功康
其祚此統羣侯而率俾共効鳧趨臻盛治於大同各抒羶
慕况我

皇上振金玉以鏗鏘合唐虞以鼓鑄夫且有典有則器媿
虞廷從茲無黨無偏民遵

王路士也精探元律聊附桐廂擊壤之歌雜誦伶章願上
蒲坂鳴球之賦

汪厚夫先生云數典精覈筆有鑪錘

漢高祖置酒沛宮擊筑歌大風賦

伊昔大澤之陂篤生真人王跡之興起於里閭入咸陽而
定秦割鴻溝而爲漢一戰成功五年戡亂故鄉重到方擁
篲而前迎亭長遄歸遂酣歌而達旦爰作室而作宮乃以
燕而以衍父老效躋堂之頌獻醴百觚賓朋輸博進之貲
賀錢萬貫方其天造草昧身試弓弮或陟崎嶇之險或歷
徭戍之勞或遁跡於陽里而子弟悉附或送徒於驪山而
士卒潛逃見大蛇之當道聞悲風之怒號揮手一去間關
夢遠回頭四望芒碭山高有時對酒尊而聊以自遣亦嘗
嘆土音之誰與其操俄而祠皇帝以誓師祭蚩尤而釁鼓
溯沛水以褰裳集沛庭而餞祖載以廣牡酌以清醕帳下

之士相與譴呼庭中之吏無不狎侮乍擊缶以佐宴娛亦
擊劍而誇威武城上之帛書初射頭來猛士於四方軍中
之赤幟方舉不數楚人之三戶維時章邯則健卒初奔子
嬰則降書已至召吏民而除苛法無所誅求封府庫以待
將軍忽遭讒忌晨張霸上之軍夜集戲西之騎項伯則函
關片語壽之以卮亞夫則玉斗一雙碎之於地他日酒酣
拔劍誰憐信越之勲名此時酒半談兵重賴良平之布置
未決雌雄不遑奔走人盡笑夫沐猴我獨資乎功狗酒闌
垓下之歌風咽烏江之口指王翳以前驅共馬童而傳首
憶兵興久矣曩時幾欲分羹莫予毒也夫此夕真堪縱酒
迺駕鑾輿爰整旌旆鏘噦噦之鸞鑣結童童之鳳蓋蓋自

十二年十月之暮收其軍而凱旋遂發百二十市上之兒
教之歌而大會詔宣三日以後車駕復欲還京帝言萬歲
以還魂魄猶樂思沛酒綠鐙紅心長氣雄艱難汗馬落拓
泥鴻聯一家於四海笑百戰於重瞳弔乞食之王孫每傷
心於既往問相人之老父杳不知其所終我歌可夫莫道
曲高和寡此風快絕何須按徵調宮爰以湯沐之恩首施
於沛何幸蠲除之惠兼及於豐爾乃濁酒千觴悲風四壁
隆準才高黔黎聽巡銷野戍之鋒煙靖中原之箭鏑聽鼓
聲而思將帥疑來角吹於中宵悲遊子而動鄉心盡入筑
聲之一擊則見雪暗亭皋雲橫巖麓霧重層嵐風迴斜谷
蛟龍幻去難尋武負之家雞犬歸來尚識胡寬之屋偶爾

土風是奏恍操軍府之琴非關易水多寒似聽秦中之筑
故老顏酖君王醉歌蒼涼角徵迢遞關河忽起舞兮慷慨
復泣下而滂沱一擊再擊兮恍和歌於燕臺之畔有酒有
酒兮如浥注乎豐澤之波非南郭之吹竽其風肆好異邯
鄲之挾瑟樂事偏多旣而返駕有期攀轅無奈金石銜恩
筮簧答籟噓氣流霞穿泉鳴瀨繞餘響於梁間唱驪歌於
門外醴酒進堯衢之祝耕鑿咸安鶯花開漢苑之春乾坤
何大迄今誦西京之樂府緬漢室之豐功終南雍隴馮翊
扶風寒煙落日牧豎樵童嶺雲不斷山花自紅坏土長陵
俯仰登臨之地歌臺舊址蒼茫憑弔之中乃歌曰斜陽遙
指漢宮樹昔日曾經翠華駐漢家天子氣何雄百二河山
收指顧可惜他年鴻鵠歌淒涼不似風雲句無限興亡懷
古情一杯絮酒臨風賦

李少白云濡染大筆搖五嶽而凌滄洲是真能以鐵
綽板唱大江東去者

鄭俠繪流民圖賦

宋室受命定鼎汴都自建隆乾德之初師旅頻興而民生未遂逮皇祐至和以後承平始奏而民困未蘇無何介甫受神宗之知遇遂使子孫改列祖之規模鴻集於澤雉離於孳提挈老幼匍匐道途嗟爾離鄉而去國誰與養老而恤孤時有光州司法參軍鄭俠者屈秩滿而入京指洛陽而就道周覽郊衢徧尋村堡野館春殘荒原秋老日黯黯而雲愁風蕭蕭而葉槁百年臺榭無多紅樹青山萬里關河剩有黃沙白草爰寓目而生悲輒憂心之如擣則見其繪之爲圖也或曳菅屨或擁絮被或操竹篔或攜土簣或剝其膚或滅其鼻或跛其足或攣其臂或半途而弟妹重

明兩堂集卷之六
逢或分道而妻孥竟棄或涉水而沾濡或登山而顛墜前有伏莽之兵戎後有食人之魑魅空裝家具竟無越宿餘糧更聽啼聲問是誰家遺穉想其紙筆方拈丹青是託灑淚點兮斑斕和墨痕而錯落椎髻蓬頭之狀描摹曲盡形容風沙霾曠之天點染別成邱壑獨運精心以構象毫端自具神通直憑隻手以迴天腕力何虞薄弱是宜上之銀臺豈可束之高閣神宗於是披圖徧覽展冊深思特頒明詔刻責有司謂歲旱其已甚信天怒之可知頽或如魴赴役者歷風霜而僕僕苛還似虎逋租者戴鎖械之纍纍彼視痾瘵在懷抱者宜解倒懸而衽席之母令瑣尾流離共嘆我生之無祿當使優游泮奭庶幾爾性之俾彌爰罷科

條特寬刑獄息青苗市易之紛紜停保甲方田之催督帝曰咨汝俠朕將倚任爲腹心民之戴我君誰不蹈舞其手足綠楊村墅披竹簟之清風紅葉山莊映茆檐之晴旭從此逍遙阡陌漸看戶口之豐盈或其點綴桑麻更繪田家之風俗無如繪圖者爲民請命植黨者多口交憎發馬遞而罪無可辯効鷹逐而力不能勝方幸甘霖之沛忽傳新法之增枉教伏闕而來獻諸黼座只合袖圖而退伴以寒鐙故蕩析離居民困無由拯救而怨咨載道民情更足哀矜也洪惟我

聖朝寰宇恬熙閭閻富贍餼華黍而常調夢旒旃而屢驗太史進農桑之冊首重民依

深宮披耕織之圖特厯

睿念奚啻人遊

化寓樂化日之舒長孰不慶洽春臺飫春膏之醲醲也哉
學使陳鍾溪先生云排空行氣波瀾老成

吳越王射潮賦

海門一線瑤島盤盪浪高雪舞濤走風驅石干鈞而怒立
雷百戰而酣呼劍潭橫而龍吼羅刹轟而鼉扶將軍拔箭
兮驚却伍相翻潮兮勁趨全江控越大海迴吳在昔錢武
肅王之捍海也蘆漬飛灰木浮巨筏危塹孤撐洪流怪突
黃牛喘兮薄沙白馬健兮負禍老蛟怒起而拏雲罔象倒
行而喝月石險波光渚凹沙凸狂溜喧豗憤泉激越魯陽
戈奮莫能平飛衛弓彎不敢發王乃選鐵弩拵銀斨調羽
箭駕玉驥甲明犀亮丁壯弓強金雷閃鐸紫電舒鉞鼓聲
忿其欲沸羽色慘其不黃天公怒兮下飛將王靈赫兮揮
長槍烏頭陣黑龍宿星蒼大合三軍之衆誓降百谷之王

霹靂鳴空魚龍奪魄谿鱷長犇窟蛟直射冰夷鼓腥浪婆
血碧張膽攢矛掀髯折戟靈夔走殭神鱗逃蹙戈船隨鷁
尾齊飛鐵鎖向鼇頭一擲臨江詫蜃氣之樓伺水搗鮫人
之宅斫鼉骨兮浮青濺虬髯兮凝赤豹霧歸山嶼煙照柵
則見翔陽浴沼圓靈舉鑣綾羅翠擁雲錦紅嬌星弧彩爛
霜鏘芒銷迺撤朱罕迺罷彤弨迺鞭獅石迺置虹橋海童
臨流而毋駭馬銜飲溪而不驕入夕迎汐入朝迎潮毬馬
之功可障湖山之福可消信乎英雄之氣壯宜其亘古之
名標迄今戍鼓秋激靈旗日暮恬波慶川瀆之朝滄海順
帆檣之度表忠則共訪殘碑弔古則猶思大樹覽南溟與
北澥兮之字揚帆緝月矢與星旄兮其琛獻輅載稽賜券

之遺勳相與臨流而作賦

楊叔溫先生云一氣灌輸英聲壯采相輔而行絕奇
絕橫之作

顧吟橋師云筆端有風雲之氣紙上聞甲馬之聲弱
齡得此能不詫爲異才

鵷鴻戲沼賦

昔虞世南雋選瀛洲高翔翰苑升鵷序以翩翩振鴻章而
蜿蜒麝煙棲穎入智永之宗門繭紙裁筒闡右軍之奧闢
天際訝霜毫之落試拂鸞牋人間看雪爪之留難參雁本
夫其秀鍾南越望重北堂結體則子雲競勝著錄則彥遠
維詳試一揮而翔舞儼六翮之開張變幻凌空豈屑爭嬌
於鸚鵡神通遊戲真堪比翼乎鴛鴦爾乃異采高騫神姿
妙擅吉光儲秘閣之珍絕甄重金闈之彥浴鵷雛而空水
澄鮮刷鴻羽而輕波明絢異雙雙之乳燕舞向梁間非點
點之輕鳧浮來水面花開銀管銜花妬翡翠之嬌浪起墨
池拍浪訝珠璣之濺則見鵷鴻之戲沼也牽荇帶兮滌洄

疊荷錢兮翩反或右拂而左縈或橫斜而側偃勢乍合而乍離態若近而若遠隨鷺羽以齊翻笑鷗眠之未穩綠波流影春隄之垂露初濃碧落書空秋浦之斜陽正晚况復鵝僚逐鴻隊以翱翔鴻侶伴鵝行而馴狎一灣溪淺啄菰米而幾誤撈蝦三折波平裊菹絲而不驚射鴨縱橫取勢映紅蓼以斜拖飄瞥隨心傍綠雲而低壓維水禽之弄翮舒卷自如擬學士之抽毫穠纖有法是真氣凌霄漢心遊靜虛道婉則運柔於勁娉婷則寓密於疎卽看裹鮓摹成有類鳩鵲之間適或恐餓蟬食去定教鷹隼之驅除香吏傳箋合仿衍波之樣新詞濯錦似開繫帛之書彼夫簪花鬪釵鳳之工迴波喻鏡鸞之妙細則蚓縮蛇縈巨則虎蹲

龍嘯健若鷗擊霜皋矯若鵬搏海嶠合胡肥鍾瘦以同工仿柳骨顏筋而各肖孰若此之名並率更神追逸少八體擷其菁華六書總其樞要蘸來碧雨却宜舞鶴同飛畫透銀沙不與塗鴉並笑欽惟

聖天子藻揆

彤墀輝騰

寶籙選鴈班之翹秀帖燦泥金占鴻漸之羽儀文成結綠瑤籤璫笈珍秘則富擬琳琅飛白硬黃

鑒賞而品逾珠玉士也鸞翔藝圃摘毫流翰墨之香竚看

鵠立

雲間簪筆紀春明之錄

學使文遠皋先生云正喻雙關鎔裁合度

麻姑搔背賦

稽異聞於仙籙寓妙術於仙心舞長袖兮風動擁寶髻兮
雲侵吹簫遠舉鳴珮遙臨手段靈空好剔銀雲之甲指揮
如意合挑碧玉之簪尋越世之奇蹤問誰化羽挾飛仙之
傲骨引我開襟維彼麻姑神光離合態度冲融接王君之
駕降蔡氏之宮偶擘麟膏欲化餐霞之鶴忽舒鳥爪疑留
印雪之鴻擎將兩股之釵珍逾掌上搔出雙鬟之玉碎落
頂中則見其濯濯有姿纖纖足念挽雲髻而增嬌摘花鬢
而露豔不羨冰肌玉骨獨憑一指以相參如攤韓集杜詩
快讀百回而不厭想像兜羅之手軟不勝搓依稀鉤弋之
拳披來可驗蔡經於是非非有想脈脈無言安得肌分而

理譬先看雨覆而雲翻如天女之散花幾至有神無迹效
野人之獻曝可能釋躁除煩願折雙腰莫道技同皮相潛
窺十指真教快絕眉軒銀海光搖玉樓寒逼思抵掌其無
緣但凝眸而暗憶承蜩可學遑辭偃僕之勞捫蝨能談欲
借爬搜之力勞君拂拭豈真手妙空空不我瑕疵可是頭
垂得得向使顯彼神通呈其絕技挹袖以探解衣而視相
君之背其如芒刺存何脫我凡胎無奈皮毛俗矣聊作拍
肩之想敬抑搔之喜聞彈指之聲轉移得此尖逾玉笋訂
一握爲笑之歡刮勝金篦具三折其肱之美爾乃王方平
嗤其狡獪怒其踈狂飛丹無術換骨無方何足求身外身
以得度何足設指非指以參詳目眩生花歎心猿之奔逐

汗流至踵嗟意馬之飛揚此鞭其背未許袒衣而示而良
其背敢云披襟以當也徒觀其調羹相餉飲酒孔皆小試
薑芽以永今夕且停鸞馭少住爲佳記痛癢於當心徒勞
屈指失神仙於交臂誰與探懷然而凜雪有方何至失其
肩背况復飛昇多妄但求束我官骸

汪厚夫先生云題面易於枯寂題位難於安置作者
以雋思運其妙筆故能曲折從心指揮如意得不歎
爲神仙狡獪也耶

彭甘亭先生云巧思濬發游戲神通金粟前身不食
人間煙火

木雞賦

原夫翰音登天以壯往而貽悔高墉射隼匪鍛羽之可勝
是以性期貞定色戒驕矜欲糾糾桓桓以作其氣必矜矜
狻狻而示無能木鷲之刻何年呈其工巧蒙鳩之卵易毀
笑其飛騰彼紀消之術誰試維莊生之喻可憑其爲王養
雞將以鬪也人皆恃乎絕有力我獨須其妙入神大名蜀
小名健刻同斷尾棲于峙棲于堞視可忘瞋望之儼然說
卦則名取諸巽勝其任也負德而氣屬乎春看曲直之無
差默爾而心都鎮靜判短長以羣立冷然而質亦柔馴其
始也王曰鬪乎剛其已克類羊溝之三歲爲株訝狸膏之
一朝驟得豈知神尚難凝氣猶不息非淵嘿以全真恐虛

慵而變色何肯多讓原因稟火之精似欲前驅獨奮雕金之飾莫謂伏而不出株同兔守堪憐試看往或無前飛與鵬搏比翼已過二旬鬪還未許羌顧影而思鳴若將飛而振羽臣當緣木以求王已聞雞而舞曷爲銳氣徒誇凝神猶未始則軒然而來繼且魁然而畏傍竹籬而善駭罌罌傳聲隨草舍以潛棲喑喑短氣聞于彼而驚于此花冠之概頓低見其影而懼其形芥羽之功徒費未幾而十日又周王疑可恃豈一月之已經更數旬而猶是然而尚恐驚心惟思疾視俯而瞰之疑披棘枳以相爭仰而矚之似奮羽毛而欲起可有敵人之在何以當之恍同孺子之驅不知所以忽焉而守雌以伏斂氣以休智從心造神與天遊

不驚馴鴿可狎眠鷗覩木形之樸遯信雞口之優柔高三尺之形絕似良工代斲具五行之質渾疑大匠矯揉吾王請嘗試之立鏡前而不舞異雞無敢應者置臆下而寡儔是蓋幾費栽培屢經宰制勿動勿慮斂彩而直欲凌虛司夜司晨藏氣而不虞負勢擬削鑿于梓慶先持七日之齋笑金距于邱孫難免一朝之敝乃知居靜功由于漸不貴飛揚忘情敵見于前何容睥睨也况以儒修深造莊敬日強識欲其定器欲其藏名類雞蟲得失何關於方寸人同木訥毀譽一任其低昂不曉然如愚乃可爲大智維柔乃可以制剛哉

孫少初先生云一片機神如工倕運矩指與物化而

不以心稽真能于律賦中獨開生面

五雀六燕賦

將欲絕舛謬於豪茫試爲核精微於算術銖兩患其不均
秒忽紛而易失維彼飛鳥之靈足證懸衡之一若爲銜書
而至五星相聚以成文或緣巢幕而來六位相成而可悉
則有雀名黃口燕號紅襟得食自能伴客投懷無異家禽
輕若鴻毛受風易側重殊蠡首入水難尋翔集休乖致知
存乎格物均齊各得作則貴在因心雀稍重而止集五賓
燕稍輕而紛張六翮賀厦偕來集衡細覈天數重乎地數
象適持平嶋鳴間以雄鳴聲還應拍低昂盡民兼參天兩
地以成能軒輕不分覺四美二難之胥獲迹固昭然理誠
莫易而如欲迭嬪呈奇或致迴翔失所燕未去而雁來雀

有巢而鳩處事成更鷺之疑勢類驚鴻之舉來如穿屋竟
同六鷁之紛飛去或銜泥僅得五鳩以相序則是參差不
過一枚之細而高下卽徵兩界之傾漫云想自天開出三
入一豈料象非中立此絀彼贏欲哀益其多寡轉顛倒夫
重輕昧乎物情奚堪稱物淆其衡鑒何以同衡良以物有
不齊數祛其冗如五音六律之相生如五角六張之合拱
不雄飛而雌伏何須羅網交加旣繩直而準平始信偏頗
無恐若使拂雲遐舉難語平施倘教化蛤重來翻嫌積重
彼夫尙乘除者以雞兔爲憑作鈎距者以牛羊爲論予智
堪矜物情或遜雖探索以得其錙銖究穿鑿而鄰於頑頓
孰若茲羽毛足愛比鴻鵠而不必無知中合相符立權衡

而可爲成憲洪惟

聖天子範垂九有私奉三無共識心懸如秤咸知事握其
樞用別嚮威胥欽建用圖呈河洛羣仰

皇圖固已洞燭無涯允作下民之式何賴雕蟲薄技旁參
羽族之殊

顧陞橋師云屈曲善達變化因心

嘯雨草堂集卷第七

嘯雨草堂集卷第八

賦十首

農乃登穀賦

太倉 盛徵璵 小雲

吳中土沃陌上雲濃腰鎌乍舉負擔相逢霜始降兮南畝
東畝秋旣成兮澤農山農隔岍行來高指誰家之廩滿車
載去聲喧半夜之春記扶東作之犁畦方病夏又拾西郊
之穗利可御冬當夫播穀乘時司農糾怠牆桑深處人攜
碧玉之鉏畦菜陰邊日麗黃花之彩問草人之糞種爰別
夫用麋用鹿而攸宜稽稻人之作田分掌夫蕩水均水而
遞改執筠筐以饁餉婦子歡兮過芳隴以催耕錢鏹痔乃

泊乎涼風至白露凝香凝村舍穉落秋腴林酣霜染野潤
雲蒸黃葉林邊飽斜陽兮一色丹楓徑畔翻罷亞兮千層
指人影於溪南和煙共語呼晚餐於舍北明月初升多稼
如雲響傳耒板柴門近水影吐漁燈歡呼叱犢之兒村村
背負躑躅扶鳩之老疊疊肩增風掃平疇清餘一碧霜屯
繡壤慶溢三登田祖有神稻孫易育九月十月之交東鄰
西鄰之屋聞香氣於炊秬聽秋聲於打穀蠻簫巫鼓賽社
則曲奏迎牲白酒黃雞祭蜡則人思介福莫不金穰獻瑞
皇上貴穀心勤勞農

恩布樂井里之恬熙信倉箱之饒裕屈指嘗新之日歡洽
萌檐關心省歛之期
惠周戎路典循觀稼間閭愜望
幸之懷吏鮮催科穗秸進
神倉之賦

顧瑛橋師云搖筆散珠賦中有畫

雙橋落彩虹賦

宣城開曉晴浦飛艫霞光十里雲影一江丹嶂高撐於石
壁紅闌斜映於蓬牕浪蹙魚鱗懸鏡浮光而夾兩橋平雁
齒飛虹噓氣而成雙憶夫元暉佐郡勝日移橈布帆無恙
高朋廣招浥東田之秀靄延西府之賓僚登北樓而興集
念南國而情遙遠水近水長橋短橋宿雨半霽殘虹未消
架石則恍浮玉柱落彩則訝襯冰綃若御風之仙人高驤
雙轡似飲溪之神女細舞雙腰碧海鯨翻天池龍躍赤射
螭頭紅連日脚可作天孫之渡兩頭定透光芒非關秦帝
之鞭對影驚看閃爍宛蛾眉兮雙鎖粲石齒而迴環儵鰲
背兮雙鉤絢苔衣而錯落元暉於是憑眺乎江干徘徊乎

畧約蕢花風裏快友偕來苻葉溪頭賞心有託呂法曹躡
雙屐而聯吟沈尚書引雙尊而對酌長江萬頃青山千載
太白載酒而登小謝斯樓常在昔之月榭風臺重以芳蘭
香茝池館依然橋梁未改翩翩兮疊霓羽之逶迤渺渺兮
聽漁歌之欸乃雙弓合成圓鏡宛拖練影於雕闌雙龍爭
跨平坡如接波紋於滄海低吸長川之水上下澄暉高遮
遠樹之雲璫瓏散彩彼夫若耶之溪剛迎浴鷺餘不之澗
暗映垂虹絮舞晴天驚起眠沙之鳥霜畱人迹疑來踏雪
之鴻劈蓮影於波心浮漚可拾湧菱花於岸腹寒翠潛通
未若茲之虹彩迷離橋心遮護西東斜帶新曦前後平連
宿霧渴如待飲畱雙釜於煙濤空欲生寒盪雙丸於朝暮

不須擲杖而登無俟刺船而渡綠楊新月待吟坡老之詞
朱草青苔先誦江郎之賦

吳頊儒先生云空靈超邁如置身於百尺樓頭年甫
成童乃已秀發若此雛鳳清於老鳳聲矣

李湘芷云氣含風雨語帶煙霞

黃裳元吉賦

地道无成天施克受含章筮其可貞括囊占其无咎惟五
居上體之中其位列羣臣之首喜至文之彌耀德合中央
欣作服以惟明亨符大有原夫坤之六五陰盛而不疑於
陽貴極而克通乎理因應悉本於中和發揮不殊於表裏
比象於黃離之吉大人有繼照之能取法乎尚製之裳君
子備日章之美其色之取於黃也靡麗無庸彰施有在非
爲黼爲繅錯雜成文豈賜紫賜緋渲妍鬪彩畧似鼎之黃
耳得以中爲實之功殊非革之黃牛蒙不可有爲之悔其
服之取乎裳也致飾於下蘊美於中絢采章於宗彝藻火
施績繡於山龍華蟲發其光華不藉慌人之手以爲黼黻

直追造化之工非同襦有衣袷特垂其戒何患困於赤紱
或受其窮故其獲吉也獨秉陰柔之正不矜威武之勲幾
疑大塊文章謝却丹青之色想見王朝絺繡宣成炳蔚之
文紆紫拖青漫誇美於素絲五紵素絲五紵披文抱質實
無需乎五入爲緇三入爲纁是知充實者乃有光輝潛藏
者自能發見如解象之得黃矢貞吉可占異噬嗑之得黃
金宏章獨擅豈其絢不由素褫鞶帶於崇朝夫且簡而多
文受絲綸於南面倘其有心粉飾侈美纓裾無實之華不
信四支能暢妄抒之藻豈真五色當於如黃鍾爲萬事之
根蘊含律呂惟繡裳協九容之美焜耀瓊琚繹坤元之至
義知內美之非虛爰有

經筵摛藻度著垂紳

綸閣宣麻儀彰束帶服十年之縫掖咸知美在其中披一
品之銖衣無敢職思其外遇

聖天子垂裳而理默運黃屋之精心凡都人士搢笏而朝
羣仰虞廷之作會

張竹垞云樹骨訓典不同纁縟

以德爲車賦

王道無偏帝心有在積中符不敗之占置郵得流行之宰
勿馳思乎北轍南轅詎貽誚乎馬煩車殆得攸往咸宜之
利就我範圍著健行不息之功無時豫怠式觀前古奚仲
作車椎輪肇始僕斲垂譽指南有藉記里非虛行人贈策
以乘軒儀容整整樸夫展軫而効駕進退與與一塵不驚
尤藉良工之御四達不悖允推君子之輿欲載令名先期
立德廣運無方馳驅有則發軔在於穆之原振策見神明
之式彙三才以轉軸乃聖乃神涵萬化以握樞惟淵惟默
倚衡可見知輿衛之日閑脫輓無虞信樞機之獨得夫惟
履道以坦在中自有文息廣騫馳思之念謝長駕遠馭之勳

凜六馬之難羈，僨車可鑿，抱一心以爲式。迪德維勤，示我周行。儼中規而不忒，操其大道，自覆轍之無聞。於是忠信爲輓，軌以仁義爲輪。檀以哲謀之舍爲控，縱以禮樂之圃爲遊。觀以率性修道爲寰區之暢，轂以達聰明目爲左右之鳴鸞。以至正大中爲九達之道，以令聞廣譽爲七寶之鞍。得惟我操縱之機，兩鞞不絕，抱無敢馳驅之隱。六轡常安，維德則安，貞獲吉，維車則高下無頗，澤欲杼而山欲伴，德自無遠，弗屈蓋象天而軫象地，德亦永矢，弗過不勞。致飾於樊纓，有基勿壞，無事爭華於僦革，中節爲和，倘非攬轡乎知仁之域，稅駕乎理義之達，徒冀馳王而軼霸，幾疑舍安而就危，要駕堪憂，何如組如絲之足，樂虛車是飾。

豈左驂右驂之咸宜，惟德操萬物之綱，豈必或軒而或輕，惟車載一心之用，不難縱之而送之我。

皇上居中以馭，抱蜀而行，本至仁爲控，勒藉妙理以持衡，噬夏后之二龍，徒矜遠駕，陋周王之八駿，不貴遐征，宜乎同軌同倫，四海適蕩，平之路來王來，享萬方仰赫，濯之聲。

張椒卿先生云：熟極生巧，分之則銖兩悉稱，合之則水乳交融。

嶰竹賦

天籟所生物宜是別大夏之西昆侖之穴碧幹蕭慘綠筠
娟潔具勁節而能虛驗中聲而清絕導淵源於班志古律
綦詳辨清濁於伶倫幽篁可截稽古軒轅皇風醇樸四氣
清和八音冲穆非誇美於會稽實取材於嶰谷挺秀峰巒
之側盡是琅玕敷榮雨露之中幾經膏沐因風戛擊如聽
百尺之桐映日參差相對一谿之竹夫其猗猗競秀息息
相吹外堅則不渝霜雪中虛則妙契希夷時流噉鳳之聲
丹山路近亦有羣鸞之集蓬島來遲嘯月吟風得自然之
清氣含宮吐徵原不假乎人爲茲乃節分爲兩竅取夫空
審音既密體物尤工采奇律於歸昌自諧鸞鷲發幽情於

寒籟宛協絲桐損益攸宜用定三分之律陰陽迭奏裁爲
十二之筩鏘鏘疊唱嫋嫋長吟圓吭乍轉餘韻未沈探消
息於黃鍾聿開篠簜聆雖喈之雅奏不隔山林謾謾風清
無異雉登乎木泠泠子和如占鶴在於陰雌雄旣別律呂
斯彰不徐不疾可宮可商匪規而圓悠揚應節不撓自直
溫潤稱良此時譜入咸池寸管裁成夫律本昔日相逢空
谷孫枝流媚乎斜陽是知材不虛生樂有由作經一日之
磨礪殖萬根之苞籥表其功用旣協響於靈禽溯彼資生
更凝情於秋壑立調元之根本六氣和皆偶發籟於虛冥
八風從各我

聖朝聲振中和氣揚清淑阜財揮虞陛之絃昭德迓箕疇

之福元音自始絲竹藉以昭宣妙理所鍾品彙於焉茂育
由是立十二均之統會紀之以三不難探八十一之根源
平之以六

顧子雨云機法一片動合自然旣水到而渠成亦花
交而綺錯

濟川用舟楫賦

稽傳巖之妙喻杼良弼之宏猷廣所濟而淵涵無竭展其
用而惠澤旁流若乘風而破浪儼擊汰而揚謳渺滄瀛之
一粟探珍秘於十洲往有功乎空極日於天風海水公無
渡也誰遺我以檜楫松舟原夫共鼓制垂虞姁惠浹運剡
木剡木之精心爰載沈載浮而利涉非深壑之能藏豈切
堂之若接蓋取諸渙請浮海而乘桴作如是觀直揚帆而
鼓楫狎浮漚於水面劃破千層放巨舶於川中飄同一葉
蓋舟楫之爲用也泳江渚盪川湄褰錦纜御金廳牙檣乍
建畫鷁齊馳千里萬里天涯海涯楫乘舟而遠送舟得楫
爲轉移擊弱水之三千崇朝至矣折黃流之九曲一葦杭

之於是濟川者通貨而來採珍而至辛苦風濤懋遷瑰異
蒲帆十幅蠻煙迷澤國之航柔櫓一枝蜚雨送海濱之吏
窮鄉絕島憑一舟兩楫之功瑋瑋珠璣獲三江五湖之利
亦有託興滄洲寄情河漢盪桂槳於瀟湘采蘭芳於沼沚
綠楊書畫米襄陽擊楫以遊明月煙波王子猷呼舟而起
不獨路通南北使馬恰如抑且人受兩三浮鷗畧似念乘
木之有功識濟盈之有以更有碧漢澄瑩銀槎迢遞託身
牛斗之墟挂席雲霞之際蔚藍一色儼歷井而捫參河鼓
三聲疑扣舷而鼓柁又何論方塘圓渚得舟子以溯洄越
艇吳艚待楫師而汔濟良以津逮之無邊始信道通之無
弗歌聲欸乃漁家之樂何如人影迷離仙侶之舟髣髴渡

逢桃葉託秋思於津亭船號木蘭樂春遊於禊祓利用信
無礙也波恬而任其所之濟人當如是乎風利而泊真可
不方今

聖天子恩周川澤威靖艤舳萬國之帆檣畢集四表之琛
賚咸通元氣爲舟統羣生而咸載道心作楫占利濟於無
窮士也慕傳說之材臨流致用陋鄭僑之政小惠難公

王春畬云中流容與與會特高

所寶惟賢賦

闡義訓於丹書肇姬宗之鴻緒獻篚爰自東都貢葵遂傳
西旅中朝通道乎遐方太保進箴於王所念彼英賢鱗集
克符廊廟之求譬諸琛寶盈前詎有梯航之阻爾惟訓于
朕志用作夫麴蘖鹽梅王其克用常人爰竭夫股肱心膂
進寶典於明堂獻賢書於當宁命司徒司馬司空而考績
儼陳彝瓚於宮庭合選士俊士造士以掄才恍列球刀於
房序時乃分三物以登崇闢四門而參考玉人以雕琢爲
工學士惟執材是抱珪璋特達昭華揚藜閣之輝琮璧駢
聯太璞耀蘭臺之藻非玩人而玩物譁器不足分榮乃如
玉而如金宅俊堪資論道陳殷置輔賁元纁束帛而禮重

招賢右史左圖收結綠青萍而士慙懷寶當年幽館容刀
藏什襲之珍此日岐陽後車載鈞璜之老象天躔之奎壁
日麗琅函擬典瑞之琥璜輝騰采纁蓋以冕旒高拱綸綍
宏施遠邇畢獻方物朝廷不貴珍奇惟克厥宅心式其敬
于庶言庶獄庶慎曰予攸好德協其極于有猷有守有爲
髦士奉璋鳳管協喈喈之奏鎬京飲酒龍旂瞻笈笈之儀
信文光之粲若惟玉色之溫其卽看洞啟金門御寶文於
玉卮何必廣開鐵網羅寶藏於波斯文章深報國之心女
其厲乃語言重成德之彥我則未惟况乃祥開崧嶽瑞應
星躔稟精英於日月發珍秘於坤乾啟櫝以陳共仰夫丹
圖紫笈臨軒而御爰披夫金簡瑤編用勸相我國家其惟

吉士役耳目於貨物豈曰能賢佩璣珩於西京茅土守河
山之誓拜珣戈於東國姓名畱金石之鐫遺我寶龜偕寶
書而並錫揚茲寶命知寶籙之長懸我

皇上德業巍增猷謨丕布光洽儒林風翔賢路衢尊是設
激淵浮玉醴之泉雲漢爲章瑞草浥金盤之露旌旗賁乎
巖阿秀髦承夫

玉輅不貴異物賤用物百度惟貞不惟其官惟其人羣才
傾慕固已掄珠貢玉彙三湘七澤之英奇何須輦賚航琛
斂四海九州之貢賦

孫少初先生云典茂宏整臺閣規模

日長如小年賦

懷友三秋看山一日曉閣晴開遙岑林密草屨尋何點之
居藜牀寘管生之室種長春之花樹靜倚雕闌學小隱於
壺天閒披緗帙爾其頤志逍遙寄情超曠玉塵頻揮瑤琴
相向銷日月於山中駐年華於天上歷十二時之往復來
朝如易星躔以八千歲爲春秋此語應非孟浪猶憶高寒
入岫清吹飄梧殘年臘破落日雲孤留梅影於羅浮纔應
小春之節動葭灰於嶰谷剛迎小至之符此時日疾於梭
刺繡遲添弱線只有夜涼於水挑鐙細數銅壺無何春巖
雨霽曙閣晴烘花補珠簾之影香霏石徑之叢繡幕鶯棲
宛轉輕煙之外玉樓人醉笙歌斜照之中恰當晝夜平分

翫韶華於一百五日留得光陰小住探秀靄於三十六宮
若乃庭繞綠陰牕延黛色水榭玲瓏雲峯峻特簾丁風動
問改歲以何時亭午雲沈待延秋而未得何必別居仙世
界溪閣招涼却疑構出小蓬瀛箭臺按刻於是展苔箋潑
林翠碧塢香勾綠醅心醉昨夜之新詩再錄恍披去歲吟
編小窻之清夢初回又話隔宵心事隱同橘叟別開洞府
之天迹異壺公亦占神仙之地况乃讀書深院繼晷虛堂
屢訝蟬聲之曳難忘駒隙之忙既惜分而惜寸亦量短而
量長畧分旦晚之功勝較三餘冬課小閱溫涼之序買成
一刻春光竚見吹律音調得氣樂陽和之宇况復登臺慶
洽迎

恩傳

萬壽之觴

董琴南師云玉樹臨風天生秀骨

紅綾餅賦

若夫藍袍乍換蕊榜初登讖記棗糕之祀班符玉笋之稱
赴宴喜曲江佳勝銜恩拜公膳頻仍有人簪紅杏而來果
然及第中使捧紅綾而至得所未曾恍疑櫻筍厨開會鸞
掖挑燈之彥不道玲瓏餽熟飫蟾宮修戶之朋昔唐僖宗
幸興慶池也泛彩扁停寶勒玳瑁筵排餽饌餅食質殊米
粳一盃抽銀線之絲品異漚椰十字破蓮花之色如或搏
將蜀錦冰麝薰宜倘教裏入吳縣霜刀截得琉璃盃底妙
莫能名瑪瑙盤中淨無可拭時則名經佛選華譙恩隆寫
紅箋而字豔抹紅硯而光融勅內府頒茲繡段詔大官賜
以簋饌五十匹翦出尙方鶴翎瑣碎十五色製傳宮婢蚶

噶爾直隸集卷八
廿
殼瓏璵但看餌束朱絲預卜郎君綬紫行見酒酣黃帕者
番名士顏紅則見爛如雜組燦若紺繒傍赤瑛而色麗映
絳蠟而輝騰織自扶桑紅蠶繭唾縲於鮫室紅淚珠凝豔
奪紅紗印冰油而漫疑碧殼光迷紅友卷花酥而不藉青
綾又見夫蜜溢粉資膏流器血伴紅麴之香濃擬紅肪之
味永畧帶燕支之潤濕仰天題疑含鸚味之丹榮叨恩幸
乳酣薄屬奚煩浣以紅瀾結解連環何處牽來紅苻倘握
赤緹而問價不須費張鷟之錢若盛緋袋而攜歸幾欲賣
公羊之餅於是和盤托出紅雪痕流舉箸香凝紅椒屑糗
想見煙生紅玉翠釜薺升更宜汁灑紅鹽綠甌影澹展齊
縷秦箏之帶綿絡重重陳餽餽粒粒之瓷菁英醅醅此日

天庖特賜百枚團龍鳳之羅他年香案叨陪五色錫鷲鷲
之餽彼夫寬焦舊煮側厚新裁薄夜襪烏皮之几胡麻伴
翠羽之罍莫不盡餘歡於寒具畱佳話於殘杯孰若茲御
饌分甘擣就蠟珠一簇綺綃結綵疊成火齊干堆此則佐
杏酪之觴紅浮杏頰若令伴桃花之飯紅點桃腮况今

龍門洞啟

鳳閣宏開

恩頒錦襖宴

賜瀛臺士也畫餅無慙定逢束帛奉羔之使從此探花有
詔且復揚鞭策馬而來

邱月樓云炊金饌玉色香味兼擅其勝

華黍賦其韻

華黍賦

金飈送爽玉露流甘覆餘糧於隴畔獲香稻於溪南覽冉冉之物華歡迎戊社咏與與之我黍慶洽丁男遠稽息物於籥章蜡成夫八上溯吹笙於鄉飲詩舉其二膏融土脈和協天時春回黍谷地少華離望如雲兮有象欣合穎兮多奇東作則預占樂歲西成則適應秋期蓮漏聲遲月冷中宵之碓菊樽釀熟雲昏晚市之旗當夫雪澤初融薰風徐拂鋪繡野兮葱籠靄青塍兮鬱叻布穀則幸值春晴芟草則無虞道芴花外叱鋤煙之犢耜已無懸村邊停饌黍之船酒還可乞問晴課雨庶幾墉如而櫛如望杏瞻榆曷敢稼不而穡不泊乎秔稻炊香楓林延靄喜秉穗之有餘

快螟蝗之無害蠻簫巫鼓比鄰喧鶯鳴之聲赤米白鹽野
叟赴雞豚之會處處柴門竹屋笑語相聞依依水郭山村
風光如繪蓋以時之和也醲膏濡醴玉燭熙春協十雨五
風之候集一莖六穗之珍陰陽平其愆伏樂利保我黎民
泉甘漱玉土潤鋪茵樹綴綠以散繭萍浮紅而躍鱗潤浥
桑麻望羊羣以候氣利通溝澮卜雞骨以迎神故其歲之
豐也旒旃夢協億秭歡多歲獲十千之利家登三百之禾
有餽有椒用獻介眉之酒以方以社聊賡擊壤之歌降嘉
種於維秬維秠旣材堅而物老畀我祀於或蹂或簸咸食
德而飲和是以車箱鱗萃倉廩蟬聯菜色減於亥市餌香
流到辛田偶來桑柘林邊相逢舊侶賽社豆花籬畔預話

明年隴覆黃雲影接千家之廩匙翻白雪香吹萬井之煙
夫惟

聖天子珠囊瑞握玉琯春融值陰陽之和會欣物產之滋
豐時雨時暘備休徵於箕範多稔多黍悉感召於

皇衷偶吟束皙之詩靈瑞紀和風甘霽長作

昇平之頌

恩波敷白叟黃童

孫少初先生云筆有餘妍詞無俗韻

嘯雨草堂集卷第八

嘯雨草堂集卷第九

排律詩五十七首

霞彩映江飛

霞彩紅于綺江邊雁共飛竹樓延霽色蘆岸映斜暉潑翠嵐疑活流丹影漸微帆隨黃葉卷船送碧雲歸鷺結孤雲伴鷗尋遠渚依岳陽風景好山色落征衣

停車坐愛楓林晚

花疑開二月楓葉落漁汀有客閒來坐輕車是處停雲低深樹屋霞映夕陽亭籐杖連朝憩籃輿幾度經愛將琴自撫喜值酒初醒小杜吟詩罷秋山澹送青

沈香亭賞花

春風初拂檻妃子試新粧酒泛千尊滿亭開四面香霞光
浮翠水花氣過紅牆侍女歡陪宴君王笑捧觴澹痕朝自
碧豔色暮將黃白也傳佳詠詩成醉欲狂

西瓜燈

客憩招涼館瓜期記已曾剖紅堪解渴刻翠却成燈碧火
光疑暗芳煙氣漸騰浮甘初出水飛焰訝生稜丁緩誇新
製辛盤擬再承琉璃明耀壁蓮炬照層層

秋燕已如客

客思今如此三秋燕已歸小庭空翠幕深巷問烏衣風景
來時異關山去路非片雲宜結伴孤鶯約齊飛遼海翔雲

渚滄江憶釣磯殷勤辭舊主相送帶斜暉

醉別江樓橘柚香

送客到江鄉江樓橘柚香醉吟湖上月別意酒邊長顆顆
垂丹實離離映綠觴輕帆出吳楚殘夢落瀟湘紅樹人千
里蒼葭水一方板橋楊柳岸春渚待歸艎

河漢近人流

同是餐霞客誰稱第一流衣香樓上月人影渚邊秋碧漢
遙相接銀河近未收津疑通寶筏波却瀉瓊鉤霧采三分
薄星光數點浮神仙逢郭李相約到瀛洲

小雨闌干柳外人

雨意暗初添闌干霖霖沾春疑歸碧柳人乍倚珠簾泥絮

螺紋壓苔痕屐齒黏輕陰萌菜甲濃翠鎖花尖彷彿侵油
幕廉纖度酒帘莫嫌羅襪冷韻事好同拈

門雖設而常關

淵明歸栗里流水繞灣環是處門雖設無人晝亦關幽藏
花一徑深鎖屋三間雲自層層罨苔還點點斑局緣防俗
客開卽見青山試訪先生宅巖棲夢亦閒

歐虞爲鷹隼

昔傳張彥遠備錄數家書鷹隼神誰肖歐虞體恰如蒼毫
風力勁素練月光疎鼓翅飛翬翟題肩走蠹魚時維揚作
勢歟彼峭凌虛
宸藻翔雲漢鸞鳳五彩舒

麥蠶

茗椀欣嘗麥筠筐愛育蠶瑞徵岐秀兩形肖繭眠三謙豆
名相襲冰蛾蛻未堪絲牽香雨潤縷疊翠雲含鶯背春難
染鶯花睡正酣搓團宜綴箔作餅或探籃桑落漿曾煮梅
風浪未涵農人歌率育

恩澤洽江南

望雲思雪意

雪意霏微聚雲容次第吹江皋勞遠望灞岸繫遐思宿霧
遙籠候新晴未放時鶴邊寒守夢驢背客吟詩出岫難成
片圍鑪可預期林昏煙自鎖山冷鳥先知咏絮才堪試披
蓑釣尚遲石欄頻徙倚誰寄隴頭枝

半里紅歌宋玉牆

江南春信早賞雨杏花香紅到文君酒枝歌宋玉牆廿番
鶯乍囀半里蝶初忙深巷頻催賣重垣未易藏東隣窺絕
豔西子試濃粧游騎來長道羣蜂度曲廊牧童遙指點桑
女伴徜徉暖意飭簫喚霞光泛紫觴

夏雨生衆綠

入夏生機鬯盈眸衆卉新四圍青黛密一雨綠螺勻小閣
聞鈴早長隄拾翠頻聚來山入畫醮起水成鱗柳線拖千
縷苔錢疊萬縉野田沈宿霧漁浦餞殘春點染濃如許迷
離辨未真鬱葱佳氣蒼培養荷

皇仁

棲巖浥飛泉

幾兩筍巖展招提是處棲飛泉晴似雨浥水淨無泥芥子
舟通澗松根石作梯一枝巢翡翠萬綠浸玻璃歸鳥時相
避驚人句獨攜遠峰當戶列匹練接雲齊荆葛煙環漱牽
蘿月映溪儘堪供枕漱索筆試畱題

送客飛鳥外

客聽驪歌唱心隨倦鳥飛河梁行漸遠尊酒送將歸一雁
翔雲表雙鳧踏翠微霜蹄看隱約雪爪認依稀盟憶江邊
訂巢憐幕上非鶯花迷驛舍風露濕在衣天際來孤鷺城
頭駐落暉俯臨潭水綠別思兩依依

春寒爲釀花

陰晴深院裏芳信釀餘寒天遺畱春住花宜耐久看金鈴
風力細寶掌露華團漸喜機械已翻憐保護難潤沾仙體
渥香浸客衣單石徑苔猶沒珠簾雪未殘漫教催羯鼓不
獸倚雕欄百卉承
恩澤清芬並蕙蘭

農服先疇

穡事先民重三農共服疇原田勤種作疆畎賴陳修蜡臘
家風古履鋤手澤畱躋堂多耆長擊壤幾春秋井里誰詒
厥艱難尙憶不故園桑蔭綠老圃稻花浮苗有懷新象人
無舍舊謀屢豐當
聖代甲子紀頻週

雲潤星輝

禊飲芳林苑春光靄甸畿雲容平積潤星彩遠流暉玉葉
垂千尺金精徹四圍沾濡仙掌醴晃耀侍臣衣翠水濃於
濯紅霞照欲飛瀼瀼資雨露點點燦珠璣香吏傳箋徧樞
曹待漏歸光華欽
聖治翹首切瞻依

舒文廣國華

太常文采富京國重才華舒卷千重錦芳菲萬樹花廣輿
涵衆美當代號專家視草傳青瑣薰蕕覆碧紗蹄涔看盡
臨溟澥渺無涯東箭珍同擅南金品共誇鳳城光射斗虎
觀氣成霞

聖代星雲爛章施普被遐

戴勝降於桑

戴此青花勝將飛復載翔適來初試翮降也似求桑雨細
銜新翠風斜倚遠揚牆邊遮蝶影陌上襲衣香沃若含朝
霧翮其下夕陽何心圖擇木着意勸提筐布穀同時集行
蠶是月忙綠雲深處望韶景媚江鄉

窻中列遠岫

憑軒宜望遠列岫恰當窻縹緲盤螺髻玲瓏瀉石淙芙蓉
環點點玉筍簇雙雙有客來相揖羣峯見欲降遙看雲裏
樹疑泛月中艘煙鎖銀鈎影風吹鐵笛腔卧遊詩卽景坐
嘯酒浮缸別墅人蹤少松濤響急瀧

柳下風來

小園多種柳濯濯好風來搖曳青垂地欹斜綠映苔人行
忘路窄客到恰門開颯爽披襟對參差傍水栽影移花滿
屋波起芥浮杯十笏含幽寂千條試剪裁梨雲低石徑桐
月下林隈讀罷蘭成賦鄉關別思催

蘭澤多芳草

放櫂滄江渚羣芳幸未殘草多生在澤香盡氣如蘭深淺
含煙密迷離帶露溥一溪清可浥萬綠秀堪餐近水螺痕
積臨風翠影寒路迷沽酒市青接釣魚竿蕙蔭三春茂芙
蓉兩岸看懷人思遠寄木末久盤桓

體仁長人

萬物皆資始乾元德長人配天能繼體率土盡歸仁在宥
鈞陶徧無私運量神心原涵衆美首出冠羣倫渙汗風雷
捷升中雨露新六龍乘以御四序恰當春保合機方豔亨
嘉澤自均

聖恩函覆廣寰寓共尊親

君子豹變

虔變占符草深山豹與羣大人明作觀君子蔚其文嘯吸
猶含霧翻騰欲化雲一斑窺約畧五彩鬪氤氲孔武羔裘
飾疑輝豸裘分身非安退谷氣已撼秋雯翠鳳翔蕤羽丹
狸列綺紋就瞻

天仗近璀璨曜祥氛

王道蕩蕩

敷言箕範著蕩蕩道同遵汝則歸其極王惟德日新坤輿
窮亥步震位紀寅賓山澤傳龍虎郊圻集鳳鱗波瀾滄海
靜風雨泰階春以此無疆福而康厥庶民幅員何翼翼原
隰自昫昫

聖治超前古沾濡

化澤均

歐冶鑄劍

古劍傳歐冶良工手鑄成乾坤錘鍊出風雨鬼神驚赤堇
雲將墮洪鑪火獨明騰煙爲虎氣飛焰卽龍精磨洗經年
久光芒一夜生虛堂馳電影石壁走雷聲薛燭新垂盼純

鈎舊擅名鍛將農器用金彩尙晶瑩

崑山片玉

江表無雙士才名重邈詵山疑崑作鎮玉以片儲珍色媚
銀屏薄暉含寶掌新一拳藏巋嶠五嶽見精神卓爾超凡
輩温其絕點塵吉光儀用羽瑞彩蔚翔麟射策凌前漢騰
輝照大秦

天閭瞻咫尺特達燦璘彬

迴狂瀾於既倒

百川誰力障砥柱獨推韓倒挾迴波起還同止水看六朝
除結習一手挽狂瀾浩渺開真境汪洋恣大觀文壇旗樹
赤學海字流丹雅藻追京雒風流紹建安莊騷才並擅潘

陸擬猶難蕪苑資沾漑千秋曜彩翰

人淡如菊

人與花俱淡司空妙解詩寫生傳逸品出世見幽姿領畧
蕭疎意消除綺豔詞清談開笑口冷趣入吟思伴月宵披
幌臨風曉倚籬蛩聲三徑寂客夢一簾遲骨相寒能耐心
情懶不知山居真味好濃泛酒千卮

醉讀離騷亦一奇

搔首憑誰問竒懷入醉眸離騷時展讀痛飲足澆愁蘭芷
芳情託虬龍幻境收沈酣開異想縹緲夢靈修湘水思停
權天津擬築樓一尊人坐嘯九辯字旁搜古注徵王逸新
詩詠陸游子雲亭下客欣賞孰能侔

寒梅着花未

屈指魚緘遞關心鶴夢寒故園遲驛使舊雨盼江干竹外
春歸易梅邊信到難倚風遙夜立鋤月幾回看簾隙香應
透牆陰盡或殘問花勞遠想話別憶長安翠羽憑誰舞紅
絃擬共彈一鐙千里客對影喚珊珊

冬者歲之餘

文史三冬足光陰一歲餘盛年真易逝殘臘又將除律應
灰飛轉珍同璧羨如晷留辰舍影人愛西山居多硯寒澌
解開簾凍萼舒舉頭仍月滿屈指已春初姬蜡歛幽籥唐
風息役車熙臺霑
聖澤嘉頌萬方臚

芳猷蘭秘

曲水開芳宴顏詩詠令猷潤如蘭氣漱妍共秘思抽醞釀
根萼厚滋培雨露稠香心言外領春影靜中留風自披襟
襲芬宜入室求捫懷虛若谷抱懷妙通幽芝畹英華擷苔
岑臭味投涵濡承

教澤翹秀萃

瀛洲

金昭玉粹

德器身兼備賡詩義溯顏昭融金在冶粹美玉藏山耀彩
披英銳含章稟靜閒功深追琢後品重廟堂間合共純鈞
映非同片石頑精芒宜作礪肉好恰如環錫貢三邦產分

符五瑞班陶鎔承

帝澤

醲化洽人寰

冬山如睡

倦眼看山色孱顏似睡餘秋嵐粧盡卽冬嶺畫難如淺黛
藜床合遙青紙帳虛酒懷歸落照詩夢入華胥徑暗遲攜
屐雲寒懶卧廬眠琴聽緩緩枕石笑蘧蘧屏待牽牛近巢
宜病鶴居

春膏回黍谷暖氣妙吹噓

吹葭六琯動飛灰

緹縵晴光合葭草暖意回截筩初應律吹琯已飛灰地室

三重閉天心半子來數將坤位協氣自震宮催撥火剛留
燼噓枯暗拂埃候占深谷黍春到故園梅土炭機緘肇洪
鑪橐籥開

授時欽

帝治庶績頌康哉

清露被皋蘭

蘭澤風光被蘅皋露氣清濯枝欣澍渥點葉耀晶瑩遠渚
痕微合平蕪態若迎煙消香易拾霧重畫難成仙掌曾擎
得騷心太瘦生幾叢青欲滴九畹綠初平薄潤含餘馥輕
陰放曉晴
恩膏承

太液嘉植徧滋榮

同簪鳳皇筆

鳳皇池上客簪筆幾回同
贈答頻裁藁雖暗擬集桐
手分薇露紫髯拂管花紅
好爵諧鳴鶴來禽識戲鴻
翩翩朋盍處洒落興酣中
磚影初春晷鈴聲昨夜風
題襟青玉案聯襟碧紗籠
彤珥供宸覽鳩班近

閩蓬

冰生池玉

呵凍裁新詠消寒韻事增
聚波池盡玉橫岸水生冰
璧彩重輪合璇源九折凝
魚看鱗欲負虹訝氣將升
銀海明於

練瓊樓照共激迴風鏗翠
珮落月澹紅燈梅影懷前
夜菱花映幾層壺中心一
片抱慄惕凌兢

發藻儒林

駿發詞林彥鴻才漢代儒
下帷披舊典射策煥新謨
珥筆摛文藻研經釀道腴
杯曾題作柱字乃貫成珠
繁露徵掇富扶風著作符
九芝輝寶鼎五鳳紀靈圖
太乙宵分表吾邱曉直廬
作人賡壽考嘉頌擬三都

前題

學闡麟經義名高虎觀儒
詞林蜚翰藻藝苑闢榛蕪
駿發天人策鴻宣聖哲謨
玉杯濡古液金簡炳炎符
秘閣徵搜

博平津禮數殊竹林新著作綿蕞舊規模載筆資揚榷窺
園戒宴娛

宸章雲漢倬揆耀邁京都

芙蓉人鏡

賦擅芙蓉鏡人傳李固言萬花濡露液一鑑麗晴暄
靄靄金爲帖團欒玉作盆澹濃簪髻色深淺畫眉痕摘愛香盈
几擎疑月滿軒衍波題彩鳳照影浴文鴛已許朱衣點無
須紫篆吞

瀛洲才彥集同沐

聖人恩

沿江柳拜人

渺渺橫江路秋光着意新幾疑菖拜竹一望柳迎人浩蕩
波如畫纏綿致入神描成舒眼態生就折腰身小別風前
揖高眠渡口陳綠雲扶不住紅雨壑將頻靜或依蘭浦恭
還釣玉津涼颺憐薄颭無計復畱春

天孫爲織雲錦裳

組織天孫手文章繪大觀爲裳紅錦麗抉漢白雲寒繚曲
新機出爬羅妙思攢銀河容四卷帶水映雙丸雅雅煙縈
篆空空語結盤淮碑題碧落石鼓供仙壇珮想飛霞舞毫
曾握月團和聲鳴

國盛百世願師韓

鄰僧每欲分齋鉢

每有談禪癖香壇許共登長齋多社友此鉢付鄰僧塵界
空還未生涯計可曾粥緣春鼓煮飯引午鐘增領取瓶誰
主分明塔欲升金鈴持索索玉版打層層錢入長生庫花
拈大智燈乞憐歌院裏到處白雲乘

西王母獻白玉環

羽仗迎王母虞廷爲獻環信呼青鳥遞瑞協白虹頒簪勝
裝三角流肪截半彎圓規同馬甲紫馭訝龍斑捧玦符珍
璽抽函劍脫環露壇停寶蓋霞珮擁仙班貢合偕瑤瑤靈
疑返玉山

彤墀開

葆扇輦賚徧人寰

沛父老畱漢高祖

漢帝關中去何時降紫騮快邀淮邑駕重作沛宮遊幟赤
揚城帛燈紅運酒籌望雲天子氣點雪老人頭泗水拳牙
轟芒山立劍矛拜恩呼萬歲錫詔復千秋舞帳悲風閃歌
臺別淚流長安龍馭返太息輦難畱

朱雲折五鹿角

易擅梁邱說交推五鹿君觥觥相角勝嶽嶽自超羣忽被
當頭喝奚容衆口紛鉤心旋欲鬪銜闕復何云羝觸占三
位銖平重一斤握疑龍耳割解肖豕牙分骨峭寒稜聳鋒
尖險語聞問誰鱗敢逆折檻重朱雲

蘇秦發書

富貴如春夢誰憐季子貧十年藤躑苦半夜篋書陳失路
鋒難試將飛羽未純金裘慙負友錦繡冀娛親術算陰陽
主權分白黑賓地輿全趙險兵法太公珍此夕寒燈瘦他
年相印新揣摩思抵掌橫散絕西秦

十日畫一水

讀畫欽王宰迴瀾勢逼真十番經措置一水見精神
泱日功難促觀圖幅可珍蔚藍雲倒影空碧雨盈旬箋劈浮濤
合泉通古脈新繪明千疊練寫出半江春月望波兼綴風
期浪恰勻化工叅石法倍見墨光皴

鬱林石

太守辭官日飄然賦倦遊鬱林虛宦橐廉石載歸舟
海濶

雖難渡裝輕底用愁一拳蘭櫂穩兩岸布帆秋鄉夢吟紅
樹閒情付白鷗盟心誰可轉介節莫相投碧水清堪况蒼
煙澹未收

聖朝敦吏治名氏政碑留

相如入室

才妙相如體宜登孔氏門姓名堂上署風雅室中存入勝
開佳境能詩沁古源仙橋尋泮水琴操譜文園絲竹空留
韻芝蘭擬贈言斗居連步穩石屋出聲喧壁立家書富庭
趨講席溫宮牆先跨越豈與舍人論

臨文不諱

文字隨時用惟期易發矇若教形頓改未必義從同諱定

名毋褻權行禮不窮克昌詩有證駿發頌猶通在或稱尼
父山誰犯魯公何妨成進士莫漫廢司空私可陳君所卑
還述廟中况當書契末尤貴理昭融

籬豆花開蟋蟀鳴

蟋蟀吟偏苦終宵易感秋豆花風乍試籬落雨初收游子
袍誰寄閨人杼莫投相思紅易減俯聽韻難流搖落呼燈
伴淒清和笛柔一枝扶瘦影四壁送新愁村外誰家砑江
頭獨客舟枯筇開逕竹唧唧滿荒邱

蘆蕝生兒芥有孫

蔬譜詳蘆蕝兼欣芥在園偶然勤灌溉宛似列兒孫短短
芽初放生生族愈繁攜持無敗類長養有殊恩出土敷新
葉埋頭數舊根拾來年尙穉載去價堪論叔待苴盈斛奴
知橘映門田家風味美老圃話寒暄

嘯雨草堂集卷第九

嘯雨草堂集卷第十

排律詩四十首

秋蘭兮青青

太倉 盛徵璣 小雲

秋意瀟瀟碧秋蘭冉冉青紫莖雲夕罨綠葉露朝零密翠
凝瑤砌輕螺映玉屏美人何處望香夢爲誰醒
紉珮情常繫吟芳句亦馨種應移九畹色自媚空庭
蘅芷舉幽渚蕪蕪觀晚汀所思惟遠道痛飲讀騷經

九月寒砧催木葉

絕域人煙少關山九月寒砧聲催木末秋意滿林端
霜葉紅於染江楓碎欲乾遼陽征戍苦塞上客衣單
刀尺閨中

怨音書夢裏看夜長遲織素風急漸流丹古堞悲笳起高樓玉笛殘長城千萬里明月照團欒

楓落寒塘露酒旗

落葉楓塘滿江天九月寒酒旗空處露茅店畫中看客到心先醉詩成興未闌釀沽紅樹裏帘卷白雲端卧柳橋無碍棲雅宿轉難風搖蕤影動霞罩蘚痕丹野叟尋歸路山僮喚晚餐斜陽村舍望犢鼻晒迴欄

繞船明月江水寒

船泛潯陽月秋水激湍三更楓葉落兩岸荻花寒遠宦頻年謫悲歌隔渚彈青衫風浙瀝紅袖淚闌干皓魄明如此遊人興未殘孤燈空對影薄酒不成歡樹色迷前渡泉

聲下急灘篷牕唸罷後惆悵客衣單

空翠落庭陰

庭陰秋籟寂結宇愛逃禪雨歇飄山翠雲來破岫煙階前花冪冪戶外竹娟娟薄潤千般活新涼一味延倒垂微有影碎滴渺無邊飛錫空驚鶴乘風暗咽蟬人來丹嶂裏鳥度綠雲前摘取襄陽句蕭齋訂夙緣

繞屋樹扶疎

老屋堪容膝陶公愛隱居覆藤枝繚繞種樹碧扶疎雨過階前濕風來牖下徐濃陰圍水榭餘翠落蓬廬斷續禽聲樂盤桓月色虛數椽煙不起一角畫難如當戶排頑石穿籬翦晚蔬山經披欲倦窮巷駐行車

落葉牛牀

落葉柴荆滿秋懷賦小園牛牀延冷碧一架負晴暄風卷
聲初碎雲飛影亂翻藥醯添浙瀝茶竈透和溫檻外迷人
徑簾前露石根吹來千點雪踏破數層痕不羨書爲枕相
看酒滿尊蘭成蕭瑟甚竹簟繫吟魂

落花無言

花品徵詩品司空續緒言依依新翠合脈脈落紅翻蝶粉
驚初墮鶯簧訝獨喧醉看肩乍聳靜對舌疑捫流水添餘
韻長門送綠痕神情渾欲睡笑語爲誰溫春憾難回首吟
殘且把樽無聲闌外立不語亦消魂

狀如松江之鱸

明月澂千里歸舟憶大蘇客來思對飲網得狀如鱸味擅
松江美人遊赤壁圖秋心寒島嶼詩夢到菰蒲貫柳銀梭
合跳波玉尺符放船紅樹早斫鱸白雲呼夜話尋三泖孤
蹤問五湖清風當此夕不碍典衣沽

畫屏無睡待牽牛

七夕羣仙會秋光入畫屏幾回風遞閣相待月過庭花簾
人無睡蓮壺漏共聽漫教拈線候早訝織梭停靜對銀河
白閒銷玉蠟青催粧鴛少夢送喜鵲多靈笑指填金盒勻
排繡樣檣牽牛今夜渡重與拜雙星

太山爲小

太山真幻相掌握亦能操微渺纔通竅渾淪莫大毫無無

無極化物物物形逃挾得心遊樂移忘指喻勞市蚊虛負
重野馬想登高體息機毋息神警象不警觀空惟覩米知
小畧如毛道本寰中具乾坤一氣豪

必學爲箕

克稟先民式弓家世造弓爲箕須審勢示業學全功袂影
句塵障科頭想化工膠粘桃幹雨絲製桺條風作戲錢思
簌如堅木待攻規成三合後巧見一彎中志與安弦異情
原鑄冶同調和稱利器絕藝妙無窮

其器廉以深

備擬商辰器廉深必應時工嚴陶正利矩協蓐收司四角
稜初起中央奧莫窺峭將金就范涵似墨流池砥礪終葵
合窠坳累黍宜取攜黃落後充貯白藏期象本藪而斂容
殊覆且歆嘗麻陳玉豆酒獻
萬年卮

噉詩不睡月滿船

今夜滄江月尋詩好放艖深更人未睡淺渚鷺先眠碧水
清如此青山思渺然湖光帆浩淼夜色櫓回旋刻燭纔停
櫂題牋乍扣舷蟾輝搖欲碎鷗夢澹初圓可許琴心寄憑
將畫意傳漁歌來別渚小倚聳吟肩

滿城風雨近重陽

不爲催租到重陽詠早成昨宵驚客夢急雨攬風聲令節
登高近新寒入夜生冷楓江口驛疎桺石頭城鈴語紛難

辨嵐容暗不明關心烏帽集屈指綠樽傾杳渺村煙合迷
離嶺霧橫潘詩如許續畫意愜吟情

一葉報秋

疎雨連朝滴中庭暑暗收俄看桐墜葉已報夜生秋清露
濡金井微風颺玉鉤片雲青欲墮一樹碧難畱消息闌中
悟機緘靜裏求涼蟬吟漸斷孤鶴夢逾幽颯若通商籟淒
其動旅愁

堯階餘麗景莫莢序方周

意愜理無違

謝公塵慮澹山水寓遐思意適襟先豁情真理不虧吟懷
隨處愜道味箇中推魚鳥神相洽煙霞興未衰清暉流冉
冉朗抱覺怡怡趣潔三生永心閒萬事宜忘機欣自得歡
物契無爲卽此堪頤性何須覓石芝

草木黃落

物序驚搖落秋深歇衆芳草根餘冷碧木葉褪微黃日薄
初經燒風高漸欲霜林容增偃蹇山骨露清蒼畫意疎如
削詩心瘦不妨鷹眸征戍疾蝶夢野園涼砧響催寒信樵
謳送夕陽春光容易轉

膏澤著蕃昌

遜志時敏

持志從謙遜乘時策進脩益於虛處集功自敏中求卑牧
矜先釋精勤業漸優惜陰嚴日昃就下擬川流滿損師歆

器心傳慕台裘捫懷徵抑抑汲古戒悠悠舊學甘盤湖名
言傳說留

緝熙瞻

帝德襄贊愧無由

九月授衣

函館迎寒早民間計授衣蠶功千戶畢雁信九秋飛候適
縫裳屆情毋挾纒違履霜陰已肅負曝暖猶微四野催刀
尺中宵響杼機同深袍澤感轉惜歲華歸染采元黃備關
心霰雪霏臣工慚補袞澣濯頌

宮闈

水歸其壑

報嗇關心祝田間水患希以漭因勢蓄其壑及時歸賦滄
支原別坊庸祀不違利沾同井徧計識曲防非涸轍知無
慮逢源得所依但期堅澤腹毋使潰川圍此日冰堪鑿來
年穀可祈河流欣順軌清晏慰

宵衣

行己有恥

士品端爲貴如何利厥行恥生期本立己正乃心亨廉節
名須副公私理必爭攬衾形共質滅火鑒常明清夜鐘堪
省圓圭玷不生若誇機械巧難免悔尤萌德稟承羞戒心
祛玩物情儲材爲
國用精白表微誠

文以載道

至道憑誰載煌煌沂大文選言微有物得旨在多聞浮藻
刪宜盡鴻篇卓不羣理超叅一貫學廣集三墳高妙心先
悟神明緒可分在茲天亦鑒未墜我能云詎止多爲富相
期德共薰儒修賅本末何羨賦凌雲

射魚指天

漫說魚能化神通度九天高高思指喻中中想爭先楊綠
絲分貫波紅眼泛圓浪花銀海蹙星的玉河懸罾破驚吞
月鱗飛定沒煙半竿浮餌卸一箭蔚藍穿迂術矜緣木機
心泥釣筌課功須器使至理不韋宣

春鷗懶避船

旅店逢春暖輕鷗懶一江閒情桃葉渡怯避木蘭艤穩夢
醒平港聯盟沂急瀧煙痕移桂櫂雪影掠篷牕巧值篙添
半渾忘槳打雙銀衣隨去去玉水泛淙淙倦對魚依藻忙
嫌鴨戲茫客船磯畔宿漁唱入吟腔

見龍在田

乾體符龍德占爻見在田居中原甚健表正自無偏屈獲
依疆畎從雲度陌阡蟠泥驚躍水得位竚騰淵東海何年
到南陽此日眠風雷開境界日月握機權苗喜霖將沛藍
看玉有煙旂旂翔

鳳闕金石姓名鐫

醴泉

聖王恩浩蕩大地澤綿延甘竟同於醴人爭飲此泉回旋
傾宿釀吐納試新煎縮酌供清酒奔流湧碧漣一杯宜饗
飫萬頃亦澄鮮振鷺濺香水春鯨吸巨川膏猶歌湛湛道
自頌平平介

壽公堂祝歡謳徧八埏

醉歌田舍酒

有客襄陽去銜杯別輞川舊廬懷舊友新酒醉新田歌詠
消長日琴書樂暮年半村圍綠樹一勺瀉紅泉多病耽高
卧浮生斷俗緣鶴隨人共懶花與月同妍春雨挑燈夜秋
風穫稻天莫嫌知己少野叟話纏綿

芭蕉分綠上窻紗

巧借芭蕉綠分來半面斜上疑延粉黛映恰到窻紗雨色
芳心碎詩魂舊夢餘三分深透箔一碧嫩抽芽螺眼捫剛
合蝦鬚捲又遮煙濃浮石髮雨細落簷花屈戌含雲翠簾
丁拂露華凭闌疑眺處竹外是鄰家

亥既珠

亥既珠呈瑞簫韶協衆音帝惟嘉乃績神亦獻其琛河上
鋪瑤席堂前飾鈿金駢聯三豕渡璀璨六身臨色媚寅階
麗聲傳丙穴深酉山輝寶笈乙庫耀華琳躋濟蒼龍佩瓊
瓏翠鳳簪鶴籌緜甲子麟牒兆辛壬渾訝雲璈夏何愁月
魄沈釣臺開玉琯璇陛紹薰琴韻和庚詩奏光從午夜尋
睿圖功邁禹輦賚徧輸忱

白雲深處老僧多

羸顏千仞鬱嵯峨是處高僧策杖過遠影送青餘霧少澹
痕浮白亂雲多超然禪室藏深樹渺若仙臺枕曲阿無着
天親長作伴蒼松翠栢復如何炊烟隱隱燒蔬笋步月時
時攬薜蘿應愛幽居成野趣却看落日起樵歌經翻貝葉
開金鏡塔湧蓮花浴翠螺擬學皈依翹首望聽來偈語細
吟哦

石泉槐火一時新

七載年華如一瞬禪堂有約悟前因詩傳夢裏依稀記節
到清明次第新石罅泉流通別院槐陰火動乞芳辰提罌
啜茗清堪品傍榻生煙色自勻今日鳳團香倍活昔時蠅

化迹歸陳前緣證得偏留後幻境參來却逼真果有明徵
吟宛宛無端振觸語頻頻坡翁如覺清都旨玉板談餘破
劫塵

詩成珠玉在揮毫

蕊宮侍史報銅鉦香案仙曹麗詠成湘管編珠揮歷落霜
毫刻玉照晶瑩綃分海客疑紅淚綵結瀛洲化赤瑛澤媚
山輝看合璧方流圓折見雙清探驪訪共藍田種採璞真
同寶掌擎架聳珊瑚星彩落堂開翡翠日華迎研因薇盥
光添潤字爲蘭薰迹倍明會有祥雲騰鳳闕何殊合浦與
連城

瑯環福地

連雲七閣搜羅徧夢到瑯環羨茂先地隔塵寰開策府天
將竒福畀神仙長庚曜彩三宵徹小酉浮嵐一線連蝌蚪
碧痕蟠玉軸珊瑚紫氣射琳編不愁銀漢渾難渡始信真
珠別有船香吏掖垣燃樺燭美人深苑理瑤牋鳳皇樓上
泥金帖翡翠堂前翰墨筵願奏大羅霓羽曲按書長侍
聖人前

遠上寒山石徑斜

欲上寒山山色遠看山百里爲停車煙鬟墮處中峰正石
角分時半徑斜縹緲芙蓉都冷澹紆迴林磳被週遮擬從
曲磴觀飛瀑直躡高岑起卧霞紅樹數重封嶺道白雲一
帶露人家密循蘿壁衣多碍遙指松巖路漸賒雪壑秋粧

尋瘦鶴霜吹落葉入昏鴉緣知小杜耽詩興不于荒郊竚
手义

花太醫

蘇郎典領司香職檢點文園百種花報道粧臺多病萼問
誰醫院擅名家枝肥不碍金刀剪骨瘦空教豔粉加紅藥
翻來應入譜綠錢賣去合桃义波斟橘井堪消渴丸貯蓮
房爲却邪料理萸囊收故局安排桃印放晨衙頭銜豈羨
尙書貴手筆都從御史誇正是養和天氣好防風繡幕漫
週遮

牆上秋山入酒杯

客居粉署鋪瑤席三雅初排泛酒舟隔座花容迎喜氣盈

甌山色入新秋岫伴疊石依牆角釀熟呼雲護甕頭空翠
落時杯不落香鱗浮出黛無浮掠開朱鳥鬢穿未斟滿紅
螺髻現不倒漬芙蓉沈古甃平添竹葉補荒邱芳醪底事
輸泉郡華宴從教記睦州中飲別嵐投杖揖重來仗汝勸
觥觥

攤飯橫眠夢蜨床

按晷中庭度午餐甜鄉酣蜨舞勾欄獨移明月床高卧爲
把清風飯細攤胸海盪開山峙顛臙神夢訴粉成團水環
鍛竈非炊黍香吐魂臺訝藝檀粲白抄知詩膈煖麴紅鋪
愛酒腸寬味回蔗境漿堪漱腹晒柯亭汁未乾磚八曠趁
遲卷箔弓雙米熟快登盤澆書有願償還否辟穀生涯亦

大難

園橋觀聽

臨雍典重漢東京天子崇文海內傾日麗橋門騰彩鳳春
流壁水舞長鯨聚觀鎬飲歌魚藻園聽笙房奏野萃席奪
戴逵誇寵遇冠彈貢禹羨蜚聲百年禮樂朝廷制一代英
豪校序盈圖史尚傳秦博士衣冠猶見魯諸生作朋椒酒
賡三壽問俗輶軒遍八瀛

聖世卽今崇學術大昕鼓篋慰羣情

人淡如菊

欲將花品徵詩品惟有寒英淡恰如以彼高情超色相伴
人吟意共蕭疎香生老圃煙深處夢冷空齋月上初小影

綠衣看獨立微風黃葉好相於不妨笑口開塵世畱取清
心賦索居彭澤歸期尋五柳楚天秋思弔三閭更誰有約
孤懷遣相對無言綺業除莫悵生涯籬下寄牛間茅屋牛
床書

嘯雨草堂集卷第十



